

## **О Древлеправославном Катехизисе**

В изданном нашей Церковью Катехизисе, который является переводом на русский язык Малого Катехизиса 1649 года, относительно времени приложения Св. Даров сказано неполно и даже несколько неясно, что может вызывать смущение у наших братий и всех, кто интересуется Древлеправославием. Поэтому имеющийся в Катехизисе текст Собор счел необходимым уточнить и дополнить. Обновленная редакция: «Вопрос: Как совершается это таинство на святой Литургии? Ответ: По обетованию Самого Господа, по Его заповеди и по Его свидетельству, которое Он произнес на тайной вечери, обращаясь к Своим ученикам: "Приимите, ядите: сие есть Тело Мое... пейте из нее все, ибо сие есть Кровь Моя" (Мф. 26, 26-28). Когда священник, по произнесении этих слов и по призывании Святого Духа на находящиеся на престоле хлеб и вино, осеняет их крестным знамением, то невидимо, ради священнического прошения и усердия на дары сходит Святой Дух. Существо хлеба и вина прелагается в существо Тела и Крови Христовых и остаются лишь виды хлеба и вина".

<http://raoc.info/church/299-dejanija-arhiereiskogo-sobora-russkoi-drevlepravoslavnoi-cerkvi-sostojavshegosja-9-12-22-25-n-st.html>

## **Катихисис (малый)**

### **Собрание краткия науки, о артикулах веры.**

Сиречь о догматех, или о преданиях веры, православно кафолическая, христианская. артикул бо, по словенску предание или сложение толкуется: по исповеданию и учению, святыя восточныя соборныя апостольския церкве, ради учения и ведения всем православным христианом. наипачеже детем учащимся, по повелению государя царя и великаго князя Алексея Михайловича всея Русии самодержьца: и по благословению великаго господина святейшаго Иосифа патриарха Московскаго и всея Русии; тиснением издася языком словенским, в царьствующем граде Москве. в лето седмь тысяще 157-е. месяца, генваря, в 20 день.

А сия напечатася во всем согласно с вышепомянутой книжицы Катихисиса, первым тиснением, в християнской типографии, при Преображенском богаделенном дому, в Москве. в лето 7418.

## ОГЛАВЛЕНИЕ:

Символ, рекше исповедание, преосвященнааго Афанасия патриарха Александрийскаго.

Анастасия блаженнааго патриарха Великия Антиохии. и Кирила Александрийскаго, изложение вкратце о вере. и вопросы и ответы о богословии.

Святаго Максима изложение о вере вкратце вопрошати и отвещавати всякому християнину православному.

Книга Катихисис рекше учение о вере, и нужнейших винах пристоящих к ней.

- Часть первая о вере.
- Другая часть о надежи.
- Третия часть, о любви к Богу, и ближнему.

Святаго Генадия, патриарха Константинопольскаго. О вере: еже убо православную веру имети, основание добрых дел есть. темже от веры начнется слово.

## **Символ, рекше исповедание, преосвященного Афанасия патриарха Александрийского.**

Иже хощет спастися, прежде всех подобает ему держати кафолическую веру. еяже аще кто целы и непорочны не соблюдает, кроме всякаго недоумения, вовеки погибнет. Вера же кафолическая сия есть, да единаго Бога в Троице, и Троицу во единице почитаем, ниже сливающе составы, ниже существо разделяюще.

Ин бо есть состав Отечъ, ин Сыновнее и Святаго Духа. но Отче и Сыновнее и Святаго Духа, едино есть Божество, равна слава, соприсносущно величество. яков Отец, таков Сын, таков и Святыи Дух.

не создан Отец, не создан Сын, не создан и Святыи Дух. непостижим Отец, непостижим Сын, непостижим Дух Святыи.

Вечен Отец, вечен Отец, вечен Сын, вечен и Святыи Дух. обаче не три вечны, но един вечны. яко же не три непостижими, ниже три несозданни, но един несозданныи, и един непостижими.

Подобне, вседержитель Отец, вседержитель Сын, вседержитель и Дух Святыи. обаче не три вседержители, но един вседержитель. Тако, Бог Отец, Бог Сын, Бог и Дух Святыи. обаче не три бози, но един Бог. равне, Господь Отец, Господь Сын и Дух Святыи. обаче не три господие, но един есть Господь. зане яко же особно койждо состав Бога и Господа исповедати, христианскою истинною понуждаемся, тако три боги, или три господы, глаголати, кафолическим благочестием возбраняемся.

Отец ни от кого есть сотворен, ни создан, ниже рожден. Сын от Отца самого есть, не сотворен, ни создан, но рожден. Дух Святыи ни рожден ни создан, но исходяще. един убо есть Отец, не три отцы. един Сын, не три сыны. един Дух Святыи, не три дуси святии. И в сей Святей Троице ничтоже первое,

или последнее, ничтоже более, или мнее, но целы три составы соприсносущны суть себе и равны. Сице яко да по всему, якоже предречеся, Троица во единице, и единица в Троице почитается. хотяи убо спастися, тако о Святей Троице да мудрствует.

*O Христе.*

Но нужно есть, к вечному спасению, да и о воплощении Господа нашего Иисуса Христа известно веровати.

есть же правая вера, да веруем и исповедуем, яко Господь наш Иисус Христос Сын Божий, Бог и человек есть; Бог от существа Отча прежде век рожденый. и человек есть от существа материя во времени рожденный. совершенный Бог, и совершенный человек, от души словесныя и человеческия плоти состояи. равен Отцу по Божеству, мни Отца по человечеству.

Иже убо аще и Бог есть человек, обаче не два, но един есть Христос. един же не пременением божества в плоть, но восприятием человечества в божество. един всяко, не слиянием естеств, но единством состава.

якоже бо душа словесная и плоть, един есть человек, тако Бог и человек, един есть Христос, пострадавши спасения нашего ради, и сошедши во ад, и в третии день воскресши из мертвых, и возышедши на небеса, и седыи одесную Бога и Отца Вседержителя, отонудуже приидет судити живым и мертвым. Егоже пришествием вси человецы воскреснут с телесы своими, и воздадут о своих делех ответ. и убо благая соделавши пойдут в жизнь вечную, злая же во огнь вечный. Сия есть кафолическая вера, еяже аще кто верно и известно верити не будет, спастися не возможет.

**Анастасия блаженного патриарха Великия Антиохии. и  
Кирила Александрийского,  
изложение вкратце о вере. и вопросы и ответы о  
богословии.**

**Вопрос:**

Коему веры еси?

**Ответ:**

Христианин есмъ.

**Вопрос:**

Что есть христианин?

**Ответ:**

Иже в Бозе живет, и благочестивно, и благолюбезне пребывает.

**Вопрос:**

О богословии колико естества исповедуешি?

**Ответ:**

Едино естество исповедую.

**Вопрос:**

Кое?

**Ответ:**

Божество.

**Вопрос:**

Что есть Бог?

**Ответ:**

Бог есть существо неповинно, и вина всяческим, сиречь, всесилен всемогии, и всякия вины и естества преестественен.

**Вопрос:**

Почему познается Отец от Сына?

**Ответ:**

По составех, понеже есть Отец нерожден.

**Вопрос:**

Почему познается, Сын от Отца?

**Ответ:**

По составех, понеже есть Сын рожден.

**Вопрос:**

Почему познается Дух Святый от Отца и Сына?

**Ответ:**

По составех, понеже есть исходящъ.

**Вопрос:**

Како веруеши?

**Ответ:**

Верую во единаго Бога Отца, и единаго рождьшагося от Него Бога Сына, и во един Дух Святый от Отца исходяща Бога.

**Вопрос:**

Что есть существо?

**Ответ:**

Существо есть вещь самобытна, не требуя иного к своему составлению.

**Вопрос:**

О божестве колико составов исповедуеши?

**Ответ:**

Три составы исповедую, Отца и Сына и Святаго Духа.

**Вопрос:**

Что есть состав?

**Ответ:**

Силу единосущну образует, естества Отчаго. лица же глаголем о Бозе безплотна, и невоображенна.

**Вопрос:**

Что есть особно всякому от трех состав, и что обще?

**Ответ:**

Особно убо есть, Отцу, нерождение. Сыну же, рождение. а Духу Святому, исхождение. обще же им божество и царство.

**[О Христе] Вопрос:**

О промышлении воплощения Христова, колико естеств исповедуеши?

**Ответ:**

Два естества исповедую, едино божества, и едино человечества.

**Вопрос:**

Что есть воля божественая?

**Ответ:**

Воля божественная есть, еже очищати прокаженныея. якоже показати хотя Христос волю и действо божественое, рече прокаженному, хощу, очистися.

**Вопрос:**

Что есть действие Божие?

**Ответ:**

Действо Божие есть, еже спастися всем человеком, и на уведение истины приити.

**Вопрос:**

Что есть воля человечия?

**Ответ:**

Воля человечия есть, еже просити да испиет, якоже на кресте.

**Вопрос:**

Что есть действие человеческое?

**Ответ:**

Действо человеческое есть, иже путь шествовати, утрудитися. и прочая таковая.

**Вопрос:**

Колико составов о воплощении исповедуешি?

**Ответ:**

Един состав исповедую, яко той един Сын Божий, и Сын Девыя.

**Вопрос:**

Почему причастник есть Сын Отцу и Святому Духу?

**Ответ:**

Причастник им есть по естеству божественному, понеже есть совершен Бог.

**Вопрос:**

Почему причастник есть человеком?

**Ответ:**

По естеству вочеловечения своего, понеже и человек совершен есть.

**Вопрос:**

Чесо ради Сын воплотися, а не Отец, или Дух?

**Ответ:**

Яко да сохранит свойство ипостаси своея, яко быти тому на  
небесех Сыну и на земли Сыну, аминь.

**Святаго Максима изложение о вере  
вкратце вопрошати и отвещавати всякому христианину  
православному.**

**Вопрос:**

Колико естеств исповедуеши о Святей и единосущней и неразделимей Троице?

**Ответ:**

Едино естество исповедую.

**Вопрос:**

Колика существа?

**Ответ:**

Едино существо.

**Вопрос:**

Колико образов?

**Ответ:**

Един образ.

**Вопрос:**

Колико воль, рекше хотении?

**Ответ:**

Едину волю.

**Вопрос:**

Колико составов, рекше лиц.

**Ответ:**

Три составы исповедую, Отца и Сына и Святаго Духа.

**Вопрос:**

Кто от Святыя Троицы воплотися?

**Ответ:**

Сын Слово.

**Вопрос:**

Колико естеств исповедуеши о Сыне Божии вочеловечьшемся нас ради?

**Ответ:**

Два естества исповедую, божество и человечество.

**Вопрос:**

Колико существ?

**Ответ:**

Два существа исповедую. едино, единосущно Отцу по божеству. и второе, единосущно матери по человечеству.

**Вопрос:**

Колико воль, рекше хотении?

**Ответ:**

Две воли исповедую, божества, и человечества.

**Вопрос:**

Колико действ?

**Ответ:**

Два действия исповедую.

**Вопрос:**

Колико составов?

**Ответ:**

Един состав, Бога Слова.

**Вопрос:**

Колико рожеств?

**Ответ:**

Два рожества исповедую, первое превечное, безлетное, бесплотное. восия бо от Отца, яко от солнца свет. второе напоследок от святыя Девы Богородицы Марии родися Бог Великий, превечный, собезначалныи, невидимыи, непостижимыи, неописанныи по Божеству, не обыменныи, съведыи сердца всем человеком.

Святая Богородица роди един состав, во двою познаваемъ естеству. по божеству бо от Отца рождество безлетно, напоследок же в лето от нея воплощъся, плотию раждаемъ. Аще же и вопрошающи назнаменуют нам, рождеися от святыя Богородицы, во двою ли естеству съи? Речем им, ей, во дву естеству есть, Бог бо есть, Той же и человек. Такоже и о распятии, и о воскресении, и о вознесении, естества сияют, а не составы. Пострада убо Христос во двою естеству съи, странным естеством распяться. плотию бо на кресте вися, а не божеством. Аще же паки рекут нам вопрошающи, два ли естества умроста? Речем им, ни, не буди то. ибо ни два естества

распята быста, но родися Христос, иже есть Бог Слово вочеловечися и родися. плотию распятыя, плотию пострада, плотию умре. без страсти убо пребывшу Божеству Его.

**Вопрос:**

Колико естеств вися на кресте?

**Ответ:**

Исус во двою естеству сыи, странным естеством висяше на кресте, плотию а не божеством. се изложение сведыи, истинныи израильянин есть, в нем же льсти несть. Аще же паки хощеши познати, что есть Бог? и како поклонятися Ему? слыши и внимай, и разумей, и увеси истинно, Отца и Сына и Святаго Духа: един свят, едино хотение, и едина воля, и едина премудрость, и едина сила. не убо ов прежде век, ов же по вецех, но купно Отец и Сын и Святыи Дух. Сын во Отце, Дух в Сыне. совокуплено бысть естество, и едино божество. Разделяетжеся по составех на трое, во единстве же паки есть, по существенному Слову. сего ради и Отца глаголюще, и Сына славяще, и Духа исповедующе, Бога именуем, Имже Божие естество обще есть, Отцу и Сыну и Святому Духу. а еже рещи, Отец и Сын и Святыи Дух, не суть общая имена, но особно коемуждо составу. Отец бо не нарицается Сын. и Сын не нарицается Отец, и Дух Святыи ни Отец ни Сын нарицается. Глаголю же три составы, сиречь три лица, един образ. Не глаголем в трех лицах, три существа, или три естества, или три боги, якоже треклятаго Ария ученицы: но единаго Бога. едино существо, и едино естество, в трех составех исповедуем.

Не глаголем един состав, якоже проклятии савелиане, но три составы, и три лица во едином образе, и во едином божестве. исповедуем и молим и почитаем.

## **Книга Катихисис**

**рекше учение о вере, и нужнейших винах пристоящих к ней.**

**Вопрос:**

Много ли есть вещей потребных, на спасение христианину православно кафолическому?

**Ответ:**

Две вещи суть [Злат. Бес. 3]: Первое доброе веровати в Господа Бога, единого во Святой Троице и всему тому яже Христос во евангелии научи. Второе, благочестно по вере жити, якоже писание святое учит [Иаков, гл. 2]: видите, яко от дел оправдается человек, а не от веры токмо. И ниже: зане якоже тело без духа мертвое есть, тако и вера без дел мертвна есть. И инде [Злат. Бес. 3, 1 Тим. глава 1]: имея веру, и благу совесть: юже неции отринувше от веры отпадоша. И на ином месте: имея таинство веры в чисте совести.

**Вопрос:**

Научи мя чесо ради первое имам доброе веровати, и потом от веры жительствовати благочестно.

**Ответ:**

Для того, яко кроме веры невозможно есть угодити Богу, якоже святый апостол Павел глаголет [евреям глава 11], веровати же подобает приходящим к Богу, яко есть, и взыскающим Его мздовоздатель бывает.

**Вопрос:**

Где имам научитися вере, и доброму жительству христианскому?

**Ответ:**

Во святом писании, и предании апостольском такоже и во святей соборней церкви, яже на соборех святыми отцы, совершенными и истинными догматами преданными. но занеже трудно есть всякому хотящему познавати веру христианскую, дабы о ней могл обие познати, сего ради в малых зде убо собраниях, или изображениах ко удобству познания предложися.

**Вопрос:**

Много ли есть частей собрания науки?

**Ответ:**

Три. В первой о изложениах веры: В другой, о надежи: В третией о любви, к Богу и к ближнему.

## Книга Катихисис

### Часть первая о вере.

**Вопрос:**

Что есть вера?

**Ответ:**

Вера есть, якоже глаголет божественныи апостол Павел [евреом, глава 11]: уповаляемыи извещение, вещем невидимым обличение: или сице [Злат. евреом, гл. 11, Бес. 32]: вера есть крепкое и твердое разумение со дерзновением в сердце о Бозе, и о вещех спасеных, ихже невидимо сердцем видим и усты исповедуем, по реченному [рим., глава 10]: сердьцем убо веруется в правду, усты же исповедуется во спасение.

**Вопрос:**

Много ли есть сложении веры?

**Ответ:**

По исповеданию веры христианския на дву вселенских соборех, первом Никейском, и втором Константинопольском сложенному, двадесять есть артикулов веры православно християнския [собор никейс. и кон.; Афан. в тол. веры].

**Вопрос:**

Которыи есть первыи [артикул] сложения веры?

**Ответ:**

Верую во единаго Бога, Отца вседержителя, творца небу и земли, видимым же всем и невидимым.

**Вопрос:**

Колико в себе сей артикул имать вещей? и чесому от него научаемся?

**Ответ:**

Три [Афан. в слове против ариан; и во исповедании тоже]: первое, како имам веровати и исповедовати, яко Бог един есть в существе своем. в трех же составех якоже се, Отец, Сын, и Дух Святыи. три убо составы един же Бог, якоже Христос во евангелии учит [Матф. 28]. шедше научите вся языки, крестяще их во имя Отца и Сына и Святаго Духа. к сему научает яко межи треми божественными собствы, первою

особою и началом конца не имущим, источником же и коренем, и виною есть Отец, Сыну рождением, и Духу Святому происхождением.

**Вопрос:**

Чесо второму научает сей артикул?

**Ответ:**

Научает, яко Бог един сыи присно, ни начала ни конца имея, благости своея ради творец есть всем видимым же и невидимым [**Дамаск. книга 2 глава 2**], яко же писание святое учит [**Деяния глава 4**]: Владыко Ты Боже сотворивыи небо и землю и море и вся яже в них. и инде [**колас. глава 1**]: яко Онем создана быша всяческая, яже на небеси и яже на земли, видимая и невидимая, аще престоли, аще господьства, аще начала, аще власти, всяческая Тем и Онем создашася.

**Вопрос:**

Чего третиаго сей артикул научает?

**Ответ:**

Научает [**Дамаск. книга 2 глава 2**], яко все вещи сотвореныя, яже и последнейшия суть, сам Бог назирает и соблюдает силою своею, по реченному [**псалом 144**], очи всех на Тя уповают, и Ты даєши им пищу во благо время, отверзаєши Ты руку Твою, и насыщаєши всяко животно благоволения.

**Вопрос:**

Чего имам боле научитися о Бозе от того сложения?

**Ответ:**

Имаши познати, яко в Бозе два суть свойства, едино убо существа есть, еже убо обще имать быти всем трем составом, якоже Богу Отцу, и Сыну, тако и Святому Духу, егда един Бог в Троице глаголется. другое свойство есть составное, и не общее, но коемуждо составу особно. якоже Отцу Сына родити, и Духа Святаго испущати: Сыну убо рождену быти от Отца прежде всех век от существа Его, такоже и Духу Святому от Того же Отца исходити.

**Вопрос:**

Кое разньство есть между свойствы состав и существа?

**Ответ:**

Свойство существа знаменует [Дамаск. книга 1, глава 9], единого Бога быти, единаго естества, и существа, славы же, и престола, и величества. свойство же паки составное знаменует во едином божестве трех лиц разделение и несмущение: яко единого состава, свойство другому составу придатися не может.

**Вопрос:**

О сотворении паки како имам разумети?

**Ответ:**

Всякое сотворение от Бога в своем естестве, совершенно и зело добре сотворено есть, по реченному [Быт. 1]: и виде Бог вся елика сотвори, и се добра зело.

**Вопрос:**

Что Господь Бог первое сотворил?

**Ответ:**

По писанному Моисеом [Быт. глава 1]; в сотворении сего видимаго мира, первое небо и землю сотворил: на концы же всего иного сотворения, человека от земли, вдохнув в него дух животен, по образу своему и по подобию сотворил.

**Вопрос:**

Преже видимаго сего мира сотворил ли что Господь Бог?

**Ответ:**

О сем научают святии отцы, святыя восточныя церкве [Злат. о проувед. достод. книга 1; Дамаск. книга 2 глава 12;

**Григор. Богос. в слове о неп.],** яко прежде сего видимаго мира, невидимии ангелове сотворени суть. человек же о дву существ составися, видимаго, и невидимаго. по видимому имать тело, а по невидимому имать душю.

**Вопрос:**

Како имам разумети о ангелех?

**Ответ:**

Ангелове суть дуси разумни [Дамаск. книга 2 глава 3], самовластнии жители, небеснии слуги Господа Вседержителя,

по реченному [**псалом 103**]: творяи ангелы своя духи, и слуги своя огнь палящь.

**Вопрос:**

На много ли чинов делятся ангели?

**Ответ:**

Девять есть чинов ангельских: престоли, херувими, серафими, начала, власти, силы, господства, архангели, и ангели.

**Вопрос:**

Как служения ангельская пред Богом?

**Ответ:**

Первое [**Дионис. о небесном священонаоч. глава 7**], Первое, Господа Бога непрестанно славити и служити Ему, по воли и по повелению Его святому. потом людем избранным Божиим ко спасению ходатайми быти, по реченному [**евреем глава 1**] не вси ли суть служебни дуси в служение посылаеми за хотящих наследовать спасение, также возвещают волю Божию, и благодейства Его чаловеком, якоже благовестил ангел Пресвятей Деве. и рождество Христово паstryрем в полуночи возвестили [**Лука 1 и 2**].

**Вопрос:**

Како имам разумети яко ангели служат нам?

**Ответ:**

Защищают нас от неприятеля душевнаго, и от всякого зла. якоже писание святое учит [**Деян. глава 5**], ангел Господень ношию отверзе двери темницы. изведе же их рече, идите, и ставше глаголите в церкви людем вся глаголы жизни сея. и на ином месте [**глава 12**]: и Петр быв в себе рече, ныне вем воистину яко посла Бог ангела своего и изят мя из руки Иродовы, и всего чаяния людей иудейских. молитвы же, и милостыни, и иная благочестивая дела наша пред престол Божии приносят, якоже писание святое свидетельствует [**Товии 12**]. когда молился еси с плачем, и погребал еси мертвия, и оставилши обед свой, скрывал еси умершья в день в дому твоем. ношию же погребал еси я, аз принесох молитву Господу Богу.

**Вопрос:**

Всякий ли человек имать ангела стражи си?

**Ответ:**

Всякий верный имеет, по глаголющему во евангелии [**Матф. 18; Дамаск. книга 2 глава 3; Дионис. о небесном священонаоч. глава 9; Феофил. на Матф. глава 18; Злат. Бес. о непос.**]: блюдите, да не презирите единаго от малых сих: глаголю бо вам, яко ангели их на небесех выну видят лице Отца Моего небеснаго. и не точию человеци имут, но и грады, страны, и царства. такоже и монастыри и церкви имут ангелов особных хранителей себе.

**Вопрос:**

Како или чим ангелов хранителей себе получаем?

**Ответ:**

Молитвою непрестанною, еже молити их о ходадействе к Господу Богу, наипаче же ангела хранителя своего, дабы молитвы наши пред престол Божии принося, ходатайствовал о нас, и сам бы был помощником, на всякого врага, паче же на невидимаго.

**Вопрос:**

Чим ангела хранителя от себе отгоняем?

**Ответ:**

Грехами, наипаче же смертными [**Злат. Матф. глава 4 бес. 5**]: тем аще и случится кому от немощи человеческия впасти в грех, наипаче же смертныи, не отлагати то, но вскоре исповеданием и покаянием очищати себе потреба, дабы ангел хранитель пакися к нам обратил, и не попущал врагу невидимому в болшия грехи нас вводити.

**Вопрос:**

Ангели вси ли святы и блази?

**Ответ:**

Ангели вси святы и блази от Господа Бога сотворени суть, но отступник с своими ему единомыслеными, волею своею отступи от Бога, и сотвори себе злым и лжею, по глаголющему Христом [**Иоан. 18**]: он человекоубийца бе искони, и во истине не стоит, яко несть истины в нем. егда

глаголет лжю, от своих глаголет, яко ложь есть, и отец лжи.  
За что и с неба свержен бысть; и вместо ангела учини себе  
сатаною и прелестником человеческим.

**Вопрос:**

Может ли диавол человека к греху приневолити?

**Ответ:**

Диавол сыи, первый враг человеку, всегда его искушает, и к  
греху приводит всякими образы по писанному [**1 Пет. глава**  
**5; Дамаск. книга глава 4**]: трезвитеся бодрствуйте, зане  
сопостат ваш диявол яко лев рыкая ходит искии кого  
поглотити, но нудити не может.

**Вопрос:**

Како имам разумети о человеке?

**Ответ:**

Человек от Господа Бога сотворен есть [**Вас. ст.**], по образу  
Его и по подобию, якоже и прежде о том научихом, прежде  
греха бе в достойнстве безгрешия (в стане невинности), не  
ведая что злаго, егда же преступи заповедь Божию, тогда  
достоинство безгрешия в стан греха, и целость человека в  
немощь бысть.

**Вопрос:**

Кое разньство есть между достоинством, безгрешия и греха?

**Ответ:**

Достоинство безгрешия [**Дамаск. книга 2 глава 1**], имать в  
себе по благодати бессмертие и нетление. достоинство греха,  
принесе с собою смерть же и тление по реченному, воньже  
убо день аще снесте от древа, смертию умрете.

**Вопрос:**

В достоинстве греха како человек бе?

**Ответ:**

В смерти, и в тлении, и во всяких страстех, и в клятве, обаче  
не без надежи, егда к змии Господь Бог глаголал [**Быт. 3**]:  
вражду убо положю посреде тебе, и посреде жены, и посреде  
семенем твоим, и посреде тоя. той тебе блюдет главу, и ты  
блюдеши ему пяту. и сия надежа и обещание Божие, даже до  
пришествия Мессии глаголанного, патриархи и пророки

утешала человеческии род. егда же Мессия желаемыи, рекше Иисус Христос прииде по обещанию, и род человеческии кровию своею от работы вражия искупи, клятву взем, бессмертие же в животе вечном даровал, яко же о том ниже научим.

**Вопрос:**

Ведал ли Бог о Адаме яко имать согрешити?

**Ответ:**

Не точию о Адаме, но и о диаволе и о всех сотворениах знал и ведал [Дамаск. книга 2 глава 4]: глаголю же о ангелех и о человечех, яже имут мыслити, глаголати, и творити: обаче сотвори се на обновление большаго благодеяния своего. в человече паки и се ведал, яко не токмо благодеяние Божие большее искуплением Его имать показатися, но яко в естестве своем и в составе Сына Божия. и имать сести одесную престола Божия [евреем глава 1]: и ангели имут пред Ним покланятися, яко пред Господем своим: имже ни злоба диавольская ниже грех человеческий в мире к тому владети и пакоствовати можаше.

**Вопрос:**

Всякое ли сотворение сам Бог надзирает?

**Ответ:**

Аще о сем и выше поведася, яко вся весть Бог, обаче к тому да скажется и истиннее: вся убо весть Господь Бог, яко и малыя вещи в деснице своей имать, и оными заведает, яко же сам во евангелии учит [Матф. глава 10; Злат. о проуведении книга 1]: не две ли птице ценитеся единому ассарию, и не едина от нею падет на земли без Отца вашего, вам же и власи главнии вси изочтени суть.

**Вопрос:**

Что же имея Господь Бог человека в дозоре своем, попусти ему в грех впасти?

**Ответ:**

Время еже в раи назнаменованное было на искус человека, еже есть даною заповедию, еяже не содержав в себе, не сыи еще благодатию утвержден, но оставлен в воли своей, по

реченному [**Сирах 15**], в начале сотвори Бог человека, и остави его в руце изволения его, рек, аще хощеши, соблюдеши заповеди, и веру сотвориши благоволения. предложил ти есть огнь и воду, и на неже хощеши, простреши руку твою. пред человеком живот и смерть. и еже аще изволит, дастся ему, но не отдав подобающаго послушания и веры, по попущению Божию впаде в грех преступления, на указание больших благодеяний Божиих.

**Вопрос:**

Кии промысл Божии о человеке в достоинстве греха?

**Ответ:**

Яко николиже милостивыи Бог от промысла своего человека оставляет, но всегда ему дает вину ко благому [**Дамаск.**

**книга 3 глава 3. и книга 2 глава 9 и 27**]: не отводя же его от самовластия се творя, но усердствуя помогает ему благодатию своею: благодать же глаголю и яже ныне даную благодать Иисус Христом.

**Вопрос:**

Чего имам более научитися от того артикула?

**Ответ:**

Яже любо лучшаго, и изряднейшаго умом своим объяти можеши, то все Господу Богу, яко существу благодателю написуй [**Дамаск. книга 1 глава 12. Иаков пос. глава 1.**

**Дион. о божествен. имен. глава 1**]. о сотворении же паки разумевай, яко яже аще в себе благо иметь, то все от Господа Бога. а яже аще злого, то от себе: глаголю же от человек и ангел злых.

**Вопрос:**

Который есть вторыи артикул веры?

**Ответ:**

И во единаго Господа Иисуса Христа Сына Божия, единороднаго, от Отца рожденаго прежде всех век. света от света, Бога истинна, от Бога истинна, рожденна а несотворенна, единосущна Отцу, имже вся быша.

**Вопрос:**

Многим ли вещем научает сей артикул?

**Ответ:**

Двум [Афан. в симв.; Дамаск. книга 1 глава 6 и 9]: первое яко Слово превечное Icус Христос от Бога Отца рожден, а не сотворен есть, и прежде век сии вкупе со Отцем, единаго существа и естества, и единаго славы, престола же и величества. Бог истинныи, от Бога истиннаго, свет несотворен, от света несотворена.

**Вопрос:**

Чесому научает другому сей артикул?

**Ответ:**

Научает сему: яко тем словом превечным весь мир видимыи же и невидимыи сотворен есть, якоже писание святое учит [Иоан. 1]: в мире бе, и мир тем бысть, и мир Его не позна. и инде [евреем глава 1]: Егоже положи наследника всем, Имже и веки сотвори.

**Вопрос:**

Та два имени Icус Христос что знаменуют?

**Ответ:**

Icус имя аще прежде сего жидове и обще употребляху: но егда Слово превечное, единородныи Сын Божии, восприем на ся человеческое естество, тогда сие имя Icус ангелом Гавриилом от Бога с небес принесено есть, еже знаменует Спасителя [Афан., в слове 3, на ариан]: якоже Матфей евангелист написует [Матф. глава 1]: родит же сына, и наречеши имя ему Icус, Той бо спасет люди своя от грех их, и от того времене сие имя бысть особное и избранное: в нем же человеческое спасение показуется, по реченному [Деян. глава 4]: несть о ином ни о едином же спасения: несть бо иного имене под небесем даннаго в человечех, о нем же подобает спастися нам. и сие имя сицевыя есть чести, яко и ангел, человеци, и диаволи нань уповати и кланятися имут, по писанному апостолом Павлом [Филипп. глава 2]: и дарова Ему имя, еже паче всякаго имене: да о имени Icусове всяко колено поклонится, небесных и земных, и преисподних.

**Вопрос:**

В какове чести от нас имать быти имя Icус?

**Ответ:**

Первое воспоминати е со всякою честию и со страхом  
благочестно с помышлением безгрешного страдания  
Христова, к сему с воздыханием и с молением, яко да ради  
Его, и волнаго страдания своего, грехи нашя отпустит, и  
милостив нам будет ныне и вовремя смерти, и в день  
праведнаго суда Его [Дамаск. книга 1].

**Вопрос:**

Христос что толкуется?

**Ответ:**

Христос толкуется помазанец [Дамаск. в слове на рожество Богородицы]: якоже в ветхом законе на три чины елеом помазовахуся: на священство, на царство, и на пророчество. тако и Христос Иисус помазанец Божий: Егоже по человечеству не елеом, но Духом Святым Бог Отец помаза на тыя три чины, по пророчеству Исаину, и во евангелии глаголющему [Исаия, 61; Лук. 4]: Дух Господень на Мне, Егоже ради помаза мя, благовестити нищим посла мя, исцелити сокрушенныя сердцем, проповедати плененным отпущение, и слепым прозрение: отпустити сокрушенныя во отраду. и в сем свидетелстве все три чины Христовы изображены суть, и на Нем се исполнися: якоже и сам о себе глаголет, тамже ниже: яко днесъ събысться писание се во ушию вашею.

**Вопрос:**

Научи мя о тех трех чинах Христовых.

**Ответ:**

Христос есть первее священником, по чину Мелхиседекову, якоже глаголет о Нем апостол, наречен есть от Бога первосвященник, по чину Мелхиседекову [евреем глава 5]: нарицаётся священник того ради: яко самого себе на жертву принесе [Злат. в слове 8 о риз. священ. книга 5]. первее во образех хлеба и вина за очищение наше. потом егда кровь свою излия якоже той же апостол глаголет [евреем глава 9], аще бо кровь козлия и телчая, и пепел юнчии кропящий оскверненыя освящает к плотней чистоте, колми паче кровь Христова, иже Духом Святым себе принесе

непорочна Богу, не очистит ли совесть нашю от мертвых дел, воеже служити нам Богу живу и истинну.

Царем же вечным называет Его ангел благовествуя [**Лука глава 1**]: и даст ему Господь Бог престол Давыда отца Его, и воцарится в дому Иаковли вовеки, и царству Еgo не будет конца: якоже и титла яже на кресте Его свидетельствует, Icус назарянин, царь иудейский [**Иоан. глава 19**].

а яже паки приуподобляется пророческому чину, то все яже что любо проповедаше и чесому научаше, чин пророческий быти сказанется.

**Вопрос:**

Чесо ради единородным Сыном Божиим нарицается?

**Ответ:**

Двоих ради вин [**Злат. о непостиж., бес. 1; Иоан. глава 1**]: первое разньства ради от Сыновни ипостаси Духа Святаго, яже от Бога же и Отца прозябает, но не образом рождения, но исхождения. единородным же нарицается разньства ради и от сынов иже токмо по благодати именуемии, якоже вернии, и избраний Богу.

по естеству убо сам точию един Icус Христос единородным Сыном Божиим нарицается, яко от существа и от Отча состава прежде всех век безначально рожден есть [**Дамаск. книга 4, глава 8**].

**Вопрос:**

Который есть третий артикул веры?

**Ответ:**

Нас деля человек, и нашего ради спасения сошедшего с небес, и воплотившагося от Духа Свята, и Марии Девы вочеловечьшася.

**Вопрос:**

Многим ли вещем научает сей артикул?

**Ответ:**

Четырем: первее, яко Сын Божий превечныи спасения ради человеческаго, благоволением Бога Отца, и Духа Святаго, снide на землю [**Дамаск. книга 3 глава 1, и 2; Афан. в слове**

**о вочеловеч.].** снide же не от места в место, понеже по божеству везде сыи, и вся исполняя, но смирив себе, и бысть человек: яко же святыи апостол Павел глаголет [**фил. глава 2**]: иже во образе Божии сыи не восхищением непещевав быти равен Богу. но себе умалил, зрак раба прием, в подобии человечестем быв, и образом обретеся яко же человек, смирил себе, послушлив быв даже до смерти.

не пременив божества в человечество, ниже человечества в божество: но бе Бог сыи истинен, восприят на ся совершеное человечество: и бысть вкупе Бог и человек, во едином составе божества, во обою существу свойства цела сохранив [**Вас.**

**Вел. о естестве челов. в Христе быт. глава 5; Дамаск.**

**книга 3 глава 3]:** и сице истинныи есть Бог, и истинныи человек, яко же о сем явственно научает, и святыи апостол Павел [**Тим. глава 3**]: воистину велия есть благочестия тайна, Бог явися в плоти.

**Вопрос:**

Чесому второму научает сей артикул?

**Ответ:**

Научает, яко Христос с собою человечества с небесе не принесе, но действом Духа Святаго восприят от пречистыя Девы Марии вовремя архангельского благовещения, идеже егда и отвеща рекущи [**Лука глава 1**]: се раба Господня, буди мне по глаголу твоему: и с словом архангеловым во утробе пречистыя Девы, совершеное божество Сына Божия, со истинным овершеным человечеством зачатся [**Дамаск. книга 3, глава 2**]: иже по божеству прежде век от Бога Отца рожден есть: а иже по человечеству от матере под леты, совершен с телом и душею человек.

**Вопрос:**

Чесого третияго научает сей артикул?

**Ответ:**

Яко зачатие Сына Божия во утробе Девыя по человечеству, действом Святаго Духа бысть яко же скажует ангел егда глаголет к Деве [**Лука глава 1**]: Дух Святыи найдет на тя и сила Вышняго осенит тя: темже и рождаемое свято, наречется

Сын Божий, также и на ином месте пишет [Матф. глава 1]:  
се ангел Господень во сне явился ему глаголя, Иосифе сыне  
Давыдов, не убоясь прияти Марию жену твою: рожьшеебося  
в ней от Духа есть Свята. тем пречистая Дева Мария, якоже  
прежде зачатия, и в зачатии, и по зачатии девою бысть: тако и  
прежде рожества, и в рождестве, и по рождестве паки девою  
бысть, и пречистою Богородицею [Дамаск. книга 3, глава 3].

**Вопрос:**

Чесому четвертому научает сей артикул? **Ответ.**

Научает о пречистей Деве: яко яже прежде век избранная, и  
преднаменованная суши от родов, мати Сына Божия,  
боголепотною честию от нас величаема и прославляема быти  
имать.

**Вопрос:**

Како пречистую Деву чтити, и величати и прославляти имам?

**Ответ:**

Аще и много образов есть почитания избранных Божиих  
святых, обаче о пречистей Деве тако потреба разумевати  
якоже святая восточная соборная и апостольская церковь  
научает. яко Богородицу Деву почитати и возвышати достоит,  
не токмо паче всех святых, но и над вся ангельский чины, над  
херувимы, и серафимы [Дамаск. в слове на рож. и успен.

**Богородицы].**

и по Господе Бозе, первую, достойною честию разумевати, по  
словесех тоя самия святая Богородицы, во святом евангелии  
лежащих [Лука глава 1], се бо отныне блажат мя вси роди:  
при том и на всякии день множицею должны есмы, якоже в  
молитвах своих, тако и кроме молитв будучи исправляти  
архангельское целование или благовещение сие глаголюще  
сице: Богородице Дево радуися обрадованная Мария Господь  
с тобою, благословена ты в женах, и благословен плод чрева  
твоего: яко родила еси Христа Спаса и Избавителя душам  
нашим.

**Вопрос:**

Како имам разумети о сем поздоровлении?

**Ответ:**

Первое имаши ведати о сем тако, яко сие поздоровление, не человеческий смысл состави, но от Господа Бога с небес архангелом Гавриилом принесено есть [Лука глава 1]. зане же николиже бы ангел потщася сам собою, благовестити Деве, аще не бы имел заповеданного о сем от Господа Бога. другая же словеса разумети имаши, святыя Елисаветы, яже иногда исполнь суши Духа Свята, и пророчествующи рекла, к сей же Деве и Богородице: якоже свидетельствует о сем Лука евангелист, некоторая же паки к сему якоже святая церковь приложи от достоинства своего [З собор Ефес.].

**Вопрос:**

Что за учение есть в сем поздоровлении?

**Ответ:**

Первое в сем поздоровлении, воспоминается воплощение Бога Слова. потом егда коли глаголется сие поздоровление, тогда от сего осуждаются вси еретици, не исповедующи Господа Христа воистину воплощьшаяся от пречистыя Девы. также осуждаются и несториане, не нарицаущи Девы пречистыя Богородицею.

в сем же воспоминающе и поздравляюще сию пречистую Богородицу, многажды приобретаем ю молитвенницу о нас, к Сыну своему и Богу нашему, яко да избавит нас от грех наших, вкупе же и враг видимых и невидимых, имже егда и при акафистах, и молебнах множицю должны емы сие поздоровление глаголати, дабы нас она омофором своим покрывши защитила от всякаго зла.

**Вопрос:**

Который есть четвертый артикул?

**Ответ:**

Распятаго за ны при Понтийstem Пилате, и страдавша и погребена.

**Вопрос:**

Многим ли вещем научаемся в сем артикуле?

**Ответ:**

Шестим: первое, якоже воистину человечество Христос Бог от пречистыя Девы прият, тако воистину в том человечестве

претерпе и умре, идеже и евангелие свидетельствует о нем тако: и возглашаш гласом велииим Иисус рече, Отче в руце Твои предаю дух Мой: и сия рек издше.

**Вопрос:**

Чесому второму научаемся от сего артикула?

**Ответ:**

Яко Христос Господь безгрешен съи, яко овча избавления ради грех наших пострада и умре, и кровь свою честную излия: якоже и святыи апостол Петр глаголет [1 Пет., глава 1]: ведуще яко неистленным сребром или златом избавистесь от суетнаго вашего жития отцы поданнаго, но честною кровию яко Агнца непорочна и пречиста Христа.

**Вопрос:**

Чесому третиему научает сей артикул?

**Ответ:**

Научает, яко Христос точио по человечеству на кресте пострада, а божество Его ничтоже пострада [Дамаск. книга 3 глава 8]: якоже святыи апостол Павел глаголет [колас. глава 4]: ныне же примери в теле плоти своея смертию Его, представити вас святы и непорочны и неповинны пред собою: аще достоит в лепоту рещи, Бог во плоти страда.

**Вопрос:**

Чесому четвертому научает сей артикул?

**Ответ:**

Учит яко страдание Христа Господа, паче иных человек бысть, якоже о том и пророк от лица Христова предвозгласи [плач Иеремии, глава 1, стих 12]: вси иже к вам проходящий путь, дася обратят и да видят, аще есть болезнь, яко болезнь моя. смерть бо Христова превосходительнейша бысть, понеже самого себе яко жертву непорочну принесе за люди: якоже святыи апостол Павел глаголет [ефес. глава 5]: предаде себе за ны, приношение и жертву Богу в воню благоухания. и инде [1 Тим. глава 2]: давши себе избавление за всех.

**Вопрос:**

Чесого пятаго научает сей артикул?

**Ответ:**

Научает, яко Сын Божий воистину яко человек умре, и погребен бысть именитыма и славныма человекома во языце жидовском, Иосифом и Никодимом [Матф. глава 27]. прочее же к тому тело Его во гробе и запечатлено было, и стражи хранимо, имже и знаменитее еже из мертвых воскресение Его было. и гроб Его по пророчеству славен бысть [Дамаск. беседа о субот.], к нему же и ныне аще кто со благоговением приидет, и верою правою множество грехов очистит.

**Вопрос:**

Чесого шестаго научает сей артикул?

**Ответ:**

Научает, яко в смерти Христове божество ниже от души, ниже от телесе Его отлучися [Дамаск. книга 3 глава 29]: но душа Его с божеством сниде во ад, и изведе оттуду вся святыя отцы, и вкупе с разбойником в рай введе.

такоже с Богом Отцем и Святым Духом по единству божества на престоле и на небеси бе, и плотию на кресте и во гробе.

**Вопрос:**

Понеже воспомянул еси о кресте, на немже Сын Божий плотию пострада, научи мене како о нем имам разумети?

**Ответ:**

Понеже о кресте воспомянух [Кирил Иерос. оглашен. глава 13], подобает его в велицей чести содержати, и употреблятися о нем выну: занеже Христос Господь спасение нам содея на нем. имже и святыи апостол Павел, егда им хвалитися сице о нем глаголет [галат. глава 6]: мне же да не будет хвалитися, точию о кресте Господа нашего Иисуса Христа, имже мне весь мир распялся, и аз всему миру.

сицевым образом и всякии християнин святым крестом да хвалится, и часто украшается, имея знамение его на себе, в церкви, в дому же и в пути [Дамаск. книга 4 глава 12]; и ко всякому делу приступая, прежде от знамения святаго креста да творит начало, глаголю же молитвы брашно, и питие. понеже неприятель душ наших, силы ради Распеншагося на том кресте спасения ради человек, не могии зretи на то крестное

знамение, бежит от нас. и не может нам пакости принести к добруму [Злат. в слове на евномиан и на многих местех].

**Вопрос:**

Коим образом знамение святаго креста имам на себе полагати?

**Ответ:**

Совокупити три персты правыя руки; сиречь великаго и малаго, и третиаго что подле малаго: в них же исповедуем таинство божественных триех ипостасей, Отца, и Сына, и Святаго Духа единого Бога в триех лицах.

два же перста протягнути вышний и средний, и сим показуем тайну самого Господа нашего Иисуса Христа, яко совершен Бог и совершен человек бысть нашего ради спасения.

и тако сложивше персты, полагаем первое руку на чело, исповедующе яко едина истиная и вечная наша глава.

Христос есть. якоже глаголет апостол [ефес. зач. 219], Господа нашего Бог Отец даде главу всех выше церквей, еже есть тело Его.

потомже кладем руку на живот, исповедующе снитие Его на землю, и еже в пречистем чреве Богоматере безсеменное Его зачатие, Той бо пройде утробу ея яко солнце стекло, не вредив ключа Девы рождеством своим.

потомже кладем на правое плече, исповедующе яко сидит одесную Бога Отца. прочее ожидая дондеже положатся врази Его под нозе Его.

потомже кладем на левое плечо, образующе, яко приидет паки второе на суд, и воздаст ошуюю сущим муку вечную, а одесную сущим вечный живот.

и тако прекрестившe лицe свое знамением крестным, глаголюще и молитву, *Господи Иисусе Христе Сыне Божии помилуй мя грешнаго*, скончавая аминъ, покланяемся Богу, яко да ошуяго стояния избавит нас, и благословение свое подаст нам.

**Вопрос:**

Которыи есть пятый артикул?

**Ответ:**

И воскресшаго в третии день по писанием.

**Вопрос:**

Многим ли вещем научает сей артикул?

**Ответ:**

Двоему: Первое, яко Сын Божий, якоже сам волею своею умре, сице силою Божества своего сам и из мертвых воста, по истинному своему словеси идеже глаголет сего ради Мя Отец любит, яко Аз душю мою полагаю, да паки прииму ю. никтоже возмет ю от Мене, но Аз полагаю ю о себе. область имам положити ю, и область имам паки прияти ю [**Иоан. глава 10**]. и се по писанию святых пророк, якоже сам глаголет [**Лука глава 24**], не сия ли подобаше пострадати Христу, и внити в славу свою: и начен от Моисея и от всех пророк сказаше има, и от всех писаний яже о Нем.

**Вопрос:**

Чесому второму научает сей артикул?

**Ответ:**

Научает, яко в том же сущем своем теле из мертвых воста, в нем же, и пострада и умре [**Дамаск. книга 14 глава 58**]. о нем же и раны свидетельствуют, которыя в руках, и ногах, и ребрах имел, ихже по воскресении из мертвых, и учеником своим показа глаголя [**Лука глава 24**]: видите руце Мои и нозе Мои, яко сам Аз есмъ. осаждите Мя и видите, яко дух плоти и кости не иметь, якоже Мене видите имуща: обаче то тело прославленое славою, ктому уже не подлежит немощем человеческим, яже прежде смерти име.

**Вопрос:**

Который есть шестыи артикул веры?

**Ответ:**

И возшедшаго на небеса и седяща одесную Отца.

**Вопрос:**

Многим ли вещем научает сей артикул?

**Ответ:**

Четырем [**Дамаск. о вознес. Господни**]: первое, яко которое тело Сын Божий восприят от пречистыя Девы, в немже

пострада и умре, и из мертвых воскрес, в томже по воскресении из мертвых со славою и на небо взыде [**Дамаск. книга 4 глава 1**]. якоже свидетельствует Лука евангелист [**Деян. глава 1**]: и сия рек зрящим им взятыся, и облак подъят Его от очио их, и седе одесную Бога Отца. якоже и Марко евангелист свидетельствует о сем [**Марк. глава 16; Дамаск. книга 4 глава 2**], Господь же убо по глаголании Его к ним вознесеся на небо, и седе одесную Бога.

**Вопрос:**

Чесому второму научает сей артикул?

**Ответ:**

Научает, яко Христос с плотию взыде на небо, по божеству бо всегда со Отцем бе, и николиже от Него отлучися, яко единосущен Ему сыи: якоже о Нем свидетельствует Иоанн евангелист [**Иоан. глава 1**]: Бога никтоже виде нигдже. единородныи Сын, сыи в лоне Отчи, Той исповеда. в лоне же слыша Отчи, то есть единого существа быти Ему.

**Вопрос:**

Чесому третиemu научает сей артикул?

**Ответ:**

Учит: яко тела сего ктому николиже оставит, еже единою прият. но вовеки е имети будет, по реченному Иисус Христос вчера и днесъ, Тойже и вовеки [**евреом глава 13; Афан. о воплощении Бога Слова**].

**Вопрос:**

Чесого четвертаго учит сей артикул?

**Ответ:**

Научает, яко плотию Христос на небеси точио есть, а не везде по апостолову словеси [**колас. глава 3; Дамаск. книга 4 глава 4**]: Христос есть одесную Бога седяи: разве пресвятыя тайны, еже в виде хлеба истинное пресвятое Его тело, и еже в вине истинная кровь Его есть: еже бывает от Духа Святаго сходящаго над дары призыванием от священника: о немже будет на своем месте учение.

**Вопрос:**

Которыи есть седмыи артикул веры?

**Ответ:**

И паки грядущаго со славою судити живым и мертвым, Егоже царствию несть конца [Деян. глава 1; Лука глава 1].

**Вопрос:**

Многим ли вещем научает сей артикул?

**Ответ:**

Трем: первой, яко Христос приити имать паки на землю судити живым и мертвым. обаче не тако якоже первое смиренно и уничиженно, но в славе и величестве, якоже сам о себе глаголет: и узрят Сына человеческаго грядущаго на облацах небесных с силою и славою великою. прежде Его пришествия знамения известная предварят якоже слышим в Матфеи евангелисте.

**Вопрос:**

Чесого другаго научает сей артикул?

**Ответ:**

Научает, яко в той последний день праведнаго суда Божия, воздадут человеци слово о всех своих мыслех, и праздных словесех и делех [Дамаск. слово о умерших], якоже сам Избавитель учит: глаголю вам яко всяко слово праздно, еже аще рекут человеци, воздадят о нем слово в день судный.

**Вопрос:**

Чесого третияго научает сей артикул?

**Ответ:**

Научает, яко в той последний день всяк кждо по делом своим восприимет. ови царство небесное наследят, к ним же речется [Матф. глава 25], приидите благословении Отца Моего, наследуйте уготованное вам царство от сложения мира. ови же муку вечную, к ним же глаголано будет, отъидите от Мене проклятии во огнь вечныи, уготованныи диаволу и ангелом его.

**Вопрос:**

Которыи есть осмыи артикул веры?

**Ответ:**

И в Духа Святаго и животворящаго, от Отца исходящаго, со

Отцем и с Сыном съпокланяема, и сславима, глаголавшаго пророки.

**Вопрос:**

Многим ли вещем научает сей артикул?

**Ответ:**

Трем [Дамаск. книга 1 глава 1; Вас. Вел. в слове о Св. Дусе]: первее, яко Дух Святыи истинныи есть Бог, соприсносущен Богу Отцу и Сыну, и единоя силы с ними, славы же и величества: якоже о том и святыи апостол Павел научает нас, сице глаголя [1 корин. глава 12; Афан. в симв.; Дионис. о Бож. имен.], разделения же дарованием суть, а Тойже Дух. и разделения служении суть, а Тойже Господь. и разделения действом суть, а тойже Бог, действуяи вся во всех.

**Вопрос:**

Чесому второму научает сей артикул?

**Ответ:**

Научает, яко Дух Святыи от единого Отча состава, яко от источника и корени в божестве от существа Его прежде век изыде [2 собор; Дион. о Бож. имен. глава 2], по Спасителеву учению [Иоан. глава 15; Дамаск. книга 1 глава 8, 9 и 10]: егда же приидет Утешитель, Егоже Аз послю вам от Отца Дух истинныи, иже от Отца исходит, Той свидетельствует о Мне. тако Господь научи, апостоли, соборы, и святии отци. за сию веру и мученици пострадаша.

**Вопрос:**

Чесого третияго научает сей артикул?

**Ответ:**

Научает, яко же в ветхом законе, тако и в новом пророки и апостолы сказася, яко Дух Святыи есть изобретатель и податель писания святаго [Афан. о воплощ. Слова Божия], по апостольску учению [1 Пет. посл. глава 1]: нибо волею бысть когда человеком пророчество, но от Святаго Духа просвещаеми, глаголаша Божии человеци.

**Вопрос:**

Много ли есть даров Духа Святаго?

**Ответ:**

Седмь, якоже их описал Исаия пророк и Иоанн святыи во Откровении своем [**Исаия глава 11; Апок. глава 4; Феофил. на Матф. глава 12**].

**Вопрос:**

Которыи есть первыи дар Духа Святаго?

**Ответ:**

Премудрость, яже от небес даема бывает, в познавании божественных вещей, о нейже нас писание тако учит [**Иаков глава 3**]: яже свыше премудрость, первое убо чиста есть, потом же мирна, кротка, благопокорлива, исполнъ милости и плодов благих, несуменна, и нелицемерна. сей противна есть мудрость мира сего, яже есть буйством у Бога, о нейже апостол Павел глаголет [**1 кор. глава 1, 2**], не обуяли Бог премудрость мира сего.

**Вопрос:**

Которыи есть вторыи дар Духа Святаго?

**Ответ:**

Есть смысл таинств веры, и воли Божии, якоже писание святое учит [**Исход глава 36**]: даде Господь Бог премудрость и разум во всяком писании и премудrosti. и апостол к Тимофею глаголет [**2 Тим. глава 2**]: даст бо тебе Господь разум о всем. сему противно есть окаменение и нечувствие сердца, к верованию и познанию. якоже Спаситель глаголет [**Лука глава 24**]: о несмысленная и косная сердцем, еже веровати о всех, яже глаголаша пророци.

**Вопрос:**

Которыи есть третии дар Духа Святаго?

**Ответ:**

Совет: егда кому даст Господь Бог ведение себе же и другу совещати, яже на спасение подобает, о немже и святыи апостол тако глаголет [**Деян. глава 20**]: не обинухбося еже не сказать вам всю волю Божию. противно есть сему совету, нечестивых совет. о немже глаголет пророк [**псалом 1**]: блажен муж, иже найде на совет нечестивых.

**Вопрос:**

Которыи есть четвертыи дар Духа Святаго?

**Ответ:**

Крепость, или мужество в вере истинней, и в житии благочестном, о нейже нас писание святое сице учит [1 кор. глава 12]. бодрствуйте, стойте в вере, мужайтесь, утверждайтесь. сему противно есть страх нечестивых. о немже писание тако глаголет [псалом 52]: тамо убоявшася страха, идеже не бе страха.

**Вопрос:**

Которыи есть пятый дар Духа Святаго?

**Ответ:**

Ведение закону и воли Божии: о нем же пророк от лица сице глаголет Бога [Иерем. глава 3]: дам вам пастырей по сердцу Моему. и будут паствити вас ведением и учением. противно есть сему незнание и неведение Бога, и закона Его: о нем же во псалмах тако глаголет [псалом 78]: излей гнев Твой на языки незнающыя Тебе, и на царствия яже имени Твоего не призываша.

**Вопрос:**

Которыи есть шестыи дар Духа Святаго?

**Ответ:**

Благочестие: еже всегда зрится при блазей вере же и добрых делех: в молитве же и в мудрствовании благодейств Божиих: о нем же апостол тако глаголет [1 Тим. глава 19]:  
благочестие на все полезно есть, обетование имея животу  
нынешняго и грядущаго. тому противно есть всякое нечестие,  
еже ни веры, ни добродетели имать.

**Вопрос:**

Которыи есть седмыи дар Духа Святаго?

**Ответ:**

Страх Божии иже нарицается сыновен, о нем же во псалмах глаголет [псалом 33]: бойтесь Господа вси святии Его. тому противно есть, еже Бога не боятися. или убо боятися рабиим образом, якоже апостол глаголет [1 Иоан. глава 4]: страха несть в любви, но совершена любы вон изгоняет страх. яко

страх муку имать. боязяся не совершается в любви. страх же сыновен есть, дар Духа Святаго, еже добре веровати в Господа Бога, и непреткновенно соблюдати святыя, Его заповеди.

**Вопрос:**

Много ли есть плодов Духа Святаго?

**Ответ:**

Всякая добродетель, и всякое благочестие, плоды суть Духа Святаго глаголются, по реченному [**ефес. глава 5**], плод духовныи есть во всякой благостини, и правде, и истине. и инде исчисляет апостол плоды Духа Святаго сице глаголя [**галат. глава 5**]: плод же духовныи есть, любы, радость, мир, долготерпение, благость, милосердие, вера, кротость, воздержание, на таковых несть закона.

**Вопрос:**

Которыи есть девятыи артикул?

**Ответ:**

Во едину святую соборную, апостольскую церковь.

**Вопрос:**

Многим ли вещем научает сей артикул?

**Ответ:**

Четырем: первой, яко едина святая соборная апостольская церковь, обручницею Христовою есть, якоже святыи апостол Павел глаголет [**2 кол. глава 11; ефес. глава 4**]: обручих бо вас единому мужу, деву чисту представити Христови. ктому едина есть вера, едино крещение, един Бог: прочее едина есть истинная и церковь.

**Вопрос:**

Что есть церковь?

**Ответ:**

Церковь есть собрание верных Божиих, во имя Господа нашего Иисуса Христа соединенных во исповедании веры, и апостольством учении во всем мире, яко удов во едином теле Христове. под единою главою единаго Господа нашего Иисуса Христа, и в повиновении подобающем обретающихся [**ефес. глава 5**].

**Вопрос:**

Чесому второму научает сей артикул?

**Ответ:**

Научает [Злат. на псал. 43], яко сия церковь соборная ни единна от человек имать нарицания себе, токмо от самого Христа, Который ея кровию своею честною искупи, и вечно себе обручи. и един главою ей яко приснаго тела есть.

**Вопрос:**

Которая церковь есть первая в начале?

**Ответ:**

Церковь в начале Иеросалимская: сия бо есть материю учителною всех иных церквей, якоже о ней писание свидетельствует, и проповедатися во имя Его покаянию, и отпущению грехов во всех языщех: наченше от Иеросалима [Лука глава 24]. и инде пишет [Деян. глава 15]: бывши же убо распри и стязанию не малу Павлу и Варнаве к ним, учиниша Павлу и Варнаве, и неким другим от них, ко апостолом и старцем во Иеросалим, о вопрошении сем. и на ином месте [Деян. глава 16]: и якоже проходжаху грады, предаяху им хранити нравы сужденыя от апостол и старец, иже во Иеросалиме. и тако церкви утверждахуся верою, и прибываху в число по вся дни.

**Вопрос:**

Чесому третиemu научает сей артикул?

**Ответ:**

Научает яко основанием и главою никтоже ин есть, токмо Христос, якоже писание святое учит [1 кор. глава 3]: основания бо иного никтоже может положити паче лежащаго, иже есть Иисус Христос. вся покори под нозе Его, и Того даде главу выше всех церквей, яже есть тело Его. и инде [ефес. глава 1]: и Той есть глава телу церкве, иже есть начаток перворожден из мертвых, яко да будет во всех Той первенъствуя. и инде [ефес. глава 5]: зане муж есть глава жене, якоже и Христос глава церкви.

**Вопрос:**

Чесого четвертаго научает сей артикул?

**Ответ:**

Учит того [**Вас. Вел. на псал. 44**], дабы есмы святей церкви яко матери нашей всякое покорение и послушание во всем отдавали, по заповеди Христове, рекшаго [**Матф. глава 18**]: аще не послушает кто свидетелей, повеждь церкви: аще же и церковь преслушает, буди ти яко язычник и мытарь.

имать церковь и сию честь от Христа яко не токмо простых людей наказует, но и клириков, епископов же, и архиепископов больших, на соборе вселенском по винам их под запрещение влагати, и отлучати, яже сама едина суши столпом и утверждением истины [**1 Тим. глава 3**]. имать же и писание святое толковати, и учители похваляти, и прославляти.

**Вопрос:**

Много ли есть церковных заповедей?

**Ответ:**

Аще их есть и немало, но главнейших есть девять: первое на всякий день по обычаю христианскому, подобающее благочестие, еже любослушати пения в церкви, или самому отправити усердне якоже се, утреню часы, вечерню, и павечерню. а где случится быти и святей литургии, то и большее слушати, наипаче же во дни праздничные, и неделныя. вонь же егда святыя литургии христианин не слушает, здрав съи и не в пути. наипаче же егда церковь близу есть, смертно согрешает. благочестивому убо непрестанно молитися подобает по реченному [**1 сел. глава 5**]: непрестанно молитися. также учение где бывает, с прилежанием слушати: и о исполнении яже к житию христианскому подобает тщатися.

**Вопрос:**

Которая есть вторая заповедь церковная?

**Ответ:**

Четыре посты поститися в лете по обычаю христианскому [**прав. апост. 69**].

Первый пред рождеством Христовым, иже начинается в 15 ноемврия.

Вторыи пост великии, иже сам Господь постился: яко же о Нем евангелист пишет [Матф. глава 4]: и постився дней, 40, и нощей, 40, последи взалка.

Третии пост апостольскии, иже начинается по недели всех святых, на память того егда апостоли посылающе на проповедь евангелия, постилися молящеся Господу Богу, яко да поможет им, яко же писание свидетельствует [Деян. глава 3]: тогда постившиеся и помолившиеся, и возложше руки на ня, послаша их. тако и мы постимся моляще Господа, яко да тоже евангелие, еже апостоли проповедали, распространение свое имело, и плод в человеческих сердцах прозябало.

Четвертыи пост зачинается первого дня августиа месяца, и пребывает даже до Успения Пресвятыя Богородицы.

**Вопрос:**

Есть ли к тому еще иные посты?

**Ответ:**

Во всякой недели должны есмы среду и пятницу поститися, по правилу 69 святых апостол.

не поститижеся суботы и недели, и иных некоторых дней заповеданных, кроме великия суботы.

в посте же паки провождати подобает, 14, день септеврия, воздвижения ради честнаго креста, и воспоминания ради волнаго страдания Христова: понеже того дне и евангелие о страстех Христовых чтется. такоже и 29 день августиа месяца, усекновения ради честныя главы святаго пророка Иоанна Крестителя, в посте паки соблюдати, и навечерия Рожества Христова, и Богоявления.

**Вопрос:**

Которая есть третия заповедь церковная?

**Ответ:**

Священников в велицей и достойней чести имети, яко Божиих слуг, и хodataев наших, наипаче же духовнаго своего отца. такоже и тех которые труждаются в проповеди слова Божия по реченому [1 Тим. глава 5]: прилежации же добре попы, сугубыя чести да сподобляются, паче же труждающиеся в слове и учении.

**Вопрос:**

Которая есть четвертая заповедь церковная?

**Ответ:**

Четырии летом подобает исповедатися. аще и частее благоговейнейшии могут: но никтоже паки да не имеет того которыи бы не имел ни единою летом исповедатися: таковыи бо под клятвою и отлучением от церкве.

**Вопрос:**

Которая есть пятая заповедь церковная?

**Ответ:**

Еретических книг не прочитати, и к соборищам их не ходити, и учения не слушати [прав. апост. 64; соб. Лаод. прав. 31, 32, 33, и 34]. также не сущу кому ученому, в словопрение с ними не въдаватися, и всячески отрицатися их, по писаному [Тим. глава 3], еретика человека по первом и втором наказании отрицайся.

**Вопрос:**

Которая есть шестая заповедь церковная?

**Ответ:**

Господа Бога просити и молити за вся иже во власти суть, за царя же и за синклит, и за всю общую вещь. также и за духовныя власти. наипаче же за тех, иже тщатся распространяти славу Божию: к сему бо нас и апостол научает глаголя [1 Тим. глава 2]: молю убо прежде всех творити молитвы, моления, прошения, благодарения за вся человеки, за царя, и за вся иже во власти суть, да тихо и безмолвно житие поживем, во всяком благоверии и чистоте. се бо добро и приятно пред Спасителем нашим Богом, иже всем человеком хощет спастися, и в разум истинный приити. также подобает молитися Господу Богу и о обращении язык, и неверных еретиков и отступников, ко святей истинней и вселеньстей церкви Христове.

прочее должны есмы Господа Бога молити и о сем, яко да избавит от работы языческия всех христиан.

**Вопрос:**

Которая есть седмая заповедь церковная?

**Ответ:**

Посты, молитвы, милостыни, служения братии нашей, с советом и повелением духовных. со тщанием должны есмы приимати и исправляти. понеже сицевыи обычай и при апостолех бысть якоже святое писание свидетельствует [Деян. глава 12]: и убо Петра стрежаху в темнице, молитва же бе прилежна бываема от церкве к Богу о нем.

**Вопрос:**

Которая есть осмая заповедь церковная?

**Ответ:**

Человек мирскии, яже преданая суть церкви, никакоже да имать взимати на потребу свою, аще будут лежащия, аще движимыя: такожде и духовнии да не имут их зле употребляти, но на потребу духовных и убогих людей изнуряти, потом на украшение и пригожение церковное. наиначе же епископове тая имения церковная да истощаяют, на странноприимницы, на школы, и на пленники. и места им такия дозирати, которыя помощи требуют, якоже христиане творили во дни святых апостол, о чем и писание сице глаголет [Деян. глава 11], ученики же аще имеяше кто, повелеша кждо их на службу послати живущым во иудеи братиям. еже и сотвориша, пославше к старцем рукою Варнавлею и Савлею.

**Вопрос:**

Которая есть девятая заповедь церковная?

**Ответ:**

Брака в заповеданныя дни не творити [Вас. Вел. ко Амфилох. прав. 27; соб. 6 прав. 24], и в сродстве не поиматися, такоже на игрища неподобныя не ходити, и от обычаяв непристойных соблюдатися.

**Вопрос:**

Которыи есть десятыи артикул веры?

**Ответ:**

Исповедую едино крещение во оставление грехов.

**Вопрос:**

Многим ли вещем научает сей артикул?

**Ответ:**

Идеже воспоминается о святом крещении ту подает образ нам к разумению святых Господних таин.

**Вопрос:**

Что есть тайна?

**Ответ:**

Тайна есть видимая вещь, уставлена же есть от Христа [Дамаск. книга 4 глава 14]: яже егда освящена бывает от священника, и ко употреблению человеком подаваема, приносит нам от Господа Бога невидимую благодать, освящающую человека и до вечнаго живота въспомогающую.

**Вопрос:**

Много ли вещей разумеется в тайне?

**Ответ:**

Четыре: первая вещь, истинная и известная самая вещь, уставлена от Христа. вторая, слова, ими же тайна освящение свое приемлет, силою Духа Святаго. третия, от кого тех тайн сподобляемся. четвертая, дело тайны.

**Вопрос:**

Много ли есть всех тайн?

**Ответ:**

По числу даров Святаго Духа Святаго седмь: еже церковию святою соборною утвержено есть.

**Вопрос:**

Которая есть первая тайна?

**Ответ:**

Крещение: которая есть порождением от воды и Духа, и ввожением к церкви Божии, и оттуду к царству небесному, по реченному [Иоан. глава 3], аминь, аминь глаголю тебе, аще кто не родится от воды и Духа, не может винти в царство небесное.

**Вопрос:**

Что имать соблюдено быти в той тайне?

**Ответ:**

Ведают о сем священници, действующий в тайнах: яко же их научают церковнии потребники: вещь убо всегда бывает вода

единая собою естественая, в ней же последи иных последований, описанных в потребах, священник егда крестит, должен глаголати сия словеса Христова: крещается раб Божий во имя Отца и Сына и Святаго Духа. тая бо словеса с тремя погруженими совершают крещение.

**Вопрос:**

Кая польза святаго крещения?

**Ответ:**

Егда человек в крещении в воде погружается и измывается, тогда невидимо в души первородный грех отмывает и очищает, яко же святыи апостол Павел научает [**1 кор. глава 6; Григ. Ниск. о крещ. Христове**]: но омытесь, но освятитесь, но оправдитесь именем Господа нашего Иисуса Христа, и Духом Бога нашего.

в то время бываем удами Христовыми, и в Него облекаемся, по того же апостола Павла учению [**гал. глава 3**]: елици бо во Христа крестистесь, во Христа облекостесь. и сице бываем наследници Богу, сънаследници же Христу [**рим. глава 8**].

**Вопрос:**

Что разумеется в том, егда кто приступает к святому крещению?

**Ответ:**

Подобает хотящему восприятии веру христианскую [**Потребник Кир. оглашен. 11**], прежде крещения своего исповедати ю, аще совершен возрастом, самому собою [**Дион. о церков. священнонач. глава 2**]. аще ли младенец, то теми иже при крещении бывают, и за него обещаваются, чтобы более к тому подобало: еже самым то священником ведати достоит.

**Вопрос:**

Которая есть вторая тайна?

**Ответ:**

Хризма, или миропомазание [**Дион. о церков. священнонач. глава 4**]: еже есть утвержение святаго крещения. которое крепка и вооружена устроет крестившагося: и непобедима воина Христова показует от всех навет невидимаго врага. по

миропомазании бо и Духа Святаго восприятие бывает, яко во бывало и во время святых апостол возложением рук, якоже о том и писание свидетельствует [**Деян. глава 8**]: тогда возложиша руце на ня и прияша Дух Свят, якоже и ныне помазанием, о нем же и святыи апостол Павел тако учит [**2 кор. глава 1**]. извествуя же нас с вами во Христа, и помазавши нас Бог, иже и запечатлевши нас, и давши обручение Духа в сердца наша.

**Вопрос:**

Что подобает разумети в тайне миропомазания?

**Ответ:**

Первое вещь освященная уготованная, юже сами болшин архиереев освящают, от них же священницы приемлют себе к сей тайне, по описанному обычаю: в нем же должни сицевая слова употребляти: **Печать дара Духа Святаго**. Понеже се дело сея тайны над всяким да бывает, над ним же по крещении сея тайны употребляют, о ней же во образи явствено и святыи Павел сице глаголя: егда же благодать и человеколюбие явися Спаса нашего Бога, не от дел праведных их же сотворихом мы, но по своей Его милости спасе нас, башею паки бытия, и обновлением Духа Святаго, Егоже излия на нас обильно Иисус Христом Спасителем нашим.

**Вопрос:**

Что разумеется в том, который к сей тайне приступает?

**Ответ:**

Первое, яко дабы скоро по крещении немедлено сия святая тайна над крещающимся совершилася, аще младенец будет, аще в возрасте: понеже святая церковь тяя тайны вкупе совокупила, крещение, и миропомазание. помазованы же бывают известныя уды тела. якоже о том в потребниках священники описано имут.

**Вопрос:**

Которая есть третьяя тайна?

**Ответ:**

Тайная вечеря Господня, на ней же истинное тело и кровь Христова, в виде хлеба и вина в воспоминание страдания

Христова, и на вечное спасение наше бывает [Дамаск. книга 4 глава 9], освященно и ядимо по словеси Павла апостола [1 кор. глава 11]: елижды бо аще ясте хлеб сей, и чашю сию пиете, смерть Господню возвещаете, дондеже убо приидет. на спасение же наше сам Спаситель научает [Иоан. глава 6]: ядьши Мою плоть, и пияши Мою кровь, имать живот вечный и Аз воскрешю его в последний день: плоть бо моя истинно есть брашно, и кровь Моя истинно есть пиво.

**Вопрос:**

Что или како имам соблюдати в сей тайне?

**Ответ:**

Первое егда священник имать совершати святую литургию, с намерением ума да совершает ю, еже святая церковь соборне убо описала своим, и несоборне [Вас. Вел. и Злат. и Иаков в литургии; Дионис. о церков. священномач. глава 3].

кому же да имать принадлежащую вещь совершенную сущу и целу, еже есть, хлеб чистый пшеничный квасный. и вино естественное с водою мало смешаное. потом и иные потребы, без нихже никакоже может святая литургия совершистися. яко же о том достаточно имамы на руку в служебниках церковных, или в потребниках.

**Вопрос:**

Како освящается сия тайна в святей литургии?

**Ответ:**

Силою Господних словес, ихже на тайней вечери учеником рек [Матф. глава 26; Вас. Вел. и Злат. в литург.; Дамаск. книга 4 глава 14, той же в слове к Захарии]: се есть тело Мое, и се есть кровь Моя, егда сия слова священником изглаголются над предложенным на престоле хлебом и вином, Дух Святый невидимо приходит: призываия ради священническаго, и прилежания и существо хлеба и вина пресуществляется в существо тела и крове Христовы, и бывают точию самыя виды хлеба и вина.

**Вопрос:**

Чим разньстует сия тайна от других?

**Ответ:**

Тем, яко сия тайна не точию в причащении по освящении тайною бывает, якоже прочия тайны: но и в самом освящении бывши тайною и жертвою за живыя и без причащения доколе виды хлеба, и вина целыя пребывают, совершенным всегда есть тела и крове Христовы тайною, и самим Христом Богом нашим: ихже ради вин ни едини иная тайна того имать, якоже та имать. понеже яко самому Богу, поклонение и честь воздатися имать от нас.

**Вопрос:**

Которым образом сия тайна разуметися имать?

**Ответ:**

Аще кто восхощет причаститися тела и крове Господни, первое да имать, по описанному церковному чину с постом, и благоговением особым приготовити себе, потом исповедатися достойне, пред священником православным, и разрешение восприятии.

такоже дабы никто же в гневе не был.

прочее егда кто к пресвятым тайнам приступает, подобает ему имети совершенную веру, яко истиннаго сущаго тела и крове Христовы причащается, имже прежде да имать и с совестию опасно разсмотритися: по словеси святаго апостола Павла [1 кор. глава 11], да искушает же человек себе, и тако от хлеба да яст, и от чаши да пиет. ядя бо и пия недостойне, суд себе яст и пиет не разсуждая тела Господня.

**Вопрос:**

Разумеется ли сия святая тайна в равенстве, под двема виды, якоже духовным, рекше священником, тако и мирским?

**Ответ:**

Тако воистину, а не иначе. понеже и предание Христово таково а не иначе есть, идеже глаголет [Матф. 25]: прием Иисус хлеб и благослови, преломи, даяше учеником, и рече: приемите и ядите, се есть тело Мое. и прием чашю, хвалу воздав, даст им глаголя: пиити от нея вси, се бо есть кровь Моя новаго завета. яже за многия изливаема, во оставление грехов.

тем кому разумеется сице [Злат. на псал. 22 и 116], якоже в

виде хлеба, телу Господню причащаемся, подобает убо всячески в виде вина, и крове Господни причащатися, аще восходещ известно себе спасение приобрести [**Дамаск. книга 4 глава 14**], яже аще и коснулобыся умышлении человеческих и неверие на се яко вещи те сумнителны ко спасению суть, пачеже ни единаго известного такова самодетеля и первого содейственника иного имут на сию тайну изобрести, якоже есть Христос Господь: иже и заповеда на вечери ко апостолом, во онех словесех сице глаголя [**Лука глава 22**]: сие творите в Мое воспоминание.

**Вопрос:**

Кая полза освящения же и причащения сея тайны?

**Ответ:**

Первая полза во освящении [**Злат. быт. поменек.**], якоже есть за живых жертвою безкровною отпущения ради грехов, тако и за умерших.

вторая в причащении, яко Христос в нас живет и мы в Нем, по реченному [**Иоан. глава 6**], ядыи Мою плоть и пияи Мою кровь во Мне пребывает и Аз в нем.

Третьяя полза. живот вечный наследуем: якоже таможе святое писание свидетельствует, и ядыи Мя, и той жив будет Мене ради. там же ниже. ядыи хлеб сей, жив будет вовеки.

Четвертая полза, яко свободни бываем от бесовских искушении, понеже егда ощутит в нас живуща Христа, не имать наветовати на нас: якоже о сем пространно и в Катехизме великому обрящеши: зде же точно подобает ведати яко да всякий человек христианин святую литоргию частее и з большим благоговением слушал и тела и крове Господни причастник был [**Злат. 1 Тим. глава 4**].

**Вопрос:**

Которая есть четвертая тайна?

**Ответ:**

Священство установленое от Христа во апостолех [**о священстве Злат.**]. ихже возложением рук на епископах, от епископов же на священниках, яже освящени бывают чином церковным, на строение святых тайн, и на преподавание

спасительного учения Христова, ибо и Господь вообразуя та два чина во оных словесех сице глаголя [**Матф. глава 28**]: шедше научите вся языки, крестяще я во имя Отца и Сына и Святаго Духа: яко же и апостол Павел тоже свидетельствует сице глаголя [**1 кор. глава 4**]: тако нас да непещет человек, яко же слуги Христовы, и строителя тайнам Божиим.

таяже два чина в священстве, и иныя меншия в себе замыкают: тако убо потреба ведати, яко ни един на священство неруковозложенный и ни тайн строителем быти не может, разве некоторых нужных случаев тайн, ниже учения Христова подавати в церкви от омбона, по реченному [**2 Тим. глава 1**]: еяже ради вины воспоминаю тебе, возгревати дар Божии, живущий в тебе, возложением руку мою. несть бо нам дал Бог дух страха, но силы и любовь и целомудрия.

руковозложение же силы никтоже имать, точию епископове.

**Вопрос:**

Что еще ино разумеется в тайне священства?

**Ответ:**

Разуметися имать сие, подобает имети освященному на сию тайну некая подобающая свойства:

Первое яко дабы был целым и здравым телом, еже бы было без споны к служению, и летами бы яко же правила повелеваают.

Второе, дабы умел ведение належащее тому чину.

Третье же, дабы и совесть ему в чем не препинала.

**Вопрос:**

Кая есть вещь, или образ тайны священства?

**Ответ:**

Вещь есть возложение рук епископских на главе, приемлющаго священство.

совершение же, учиненая тому молитва, юже епископ единою с возложением рук, над главою освящающагося глаголет: еже есть божественная благодать, и прочая.

**Вопрос:**

Кая дела суть сея тайны?

**Ответ:**

Якоже и выше не единою поведася, яко строити тайнами Господними, и учити святому евангелию?

**Вопрос:**

Есть ли яковыя чины пред тою тайною?

**Ответ:**

Есть: о нихже добре сами епископове и священници ведают, и при освящении бывают оглашены егда орудия всякому чину належащия бывают предаваны.

**Вопрос:**

Которая есть пятая тайна?

**Ответ:**

Покаяние, еже за грехи бывает с сокрушением сердечным во исповедании грехов, с надеждою о отпущении, ради и излиания честныя крове Сына Божия, и то разрешением священническим, имже сила дана есть от Христа вязати же и решити [Афан. о воплощ. Бога; слово Злат. евреем глава 12 бес. 31].

**Вопрос:**

Како или что подобает разумети в сей тайне?

**Ответ:**

Первое кающемуся подобает быти христианином православно верующим. понеже без благия веры, ни единое же покаяние быти может.

Второе, разрешити кающагося никтоже может, точию православный священник, понеже кроме церкви несть спасения и разрешения.

Третье которые к покаянию приступает, подобает ему имети сетование и сокрушение сердечное, за тыя грехи, ими же ко Господу Богу и ближнему приразися.

Четвертое: яко да иметь вся своя грехи ихже кается исповедати: понеже не иметь его разрешити от того, о чем не ведает священник якоже о том много свидетельств во святом писании обрящеши: а наипервее в деяниях апостолских [Деян. глава 19]: мнози же от веровавших приходжаху исповедающе, и сказующе дела своя. такоже и ко Иоанну

Крестителю вси приходящии исповедовали грехи своя: якоже Марко евангелист свидетельствует [**Мар. глава 1**]: и исходжаше к нему вся иудейская страна и иеросалимляне и крещахуся вси во Иордане реце от него, исповедающе грехи своя: к сему и заповедь апостольская послушествует сице глаголющи [**Иаков.**]: исповедайте убо друг другу согрешения. исповедатися убо никому же иному имамы, точию пред теми, иже имут силу разрешити, и с ведением нам совещати.

**Вопрос:**

Како бывает разрешение грехов от духовнаго отца?

**Ответ:**

По слышании исповеди от кающагося священник добре разсудивши истинное его исповедание сокрушение же сердечное и предложение и устроение, ко целомудрению, такоже и произволение соблюдатися от грехов, разрешает его по достоинству покаяния от грех, в нихже имать разрешити или удержати.

разрешая же его в молитвах своих и употребляет сими словесы глаголя, аз данною мне властию от Христа разрешаю тя, во имя Отца и Сына и Святаго Духа: имиже творит его приятна телу и крови Господни, яко и на судном дни не имать быти осужен по реченному: аминь аминь глаголю вам, елика аще свяжете на земли, будут связана на небеси: и елика аще разрешите на земли, будут разрешена и на небеси.

**Вопрос:**

Кая дела сея тайны?

**Ответ:**

Явныя дела суть [**Злат. на псал. 142 бес. 5 о покаян.**], яко человек избыв греха приобретает себе якобы второе безгрешие, и от сына гнева и неблагодати, бывает сыном благодати Божия, егда доволно за грехи исправит каяся, по заповеди и учению духовнаго отца.

**Вопрос:**

Которая есть шестая тайна?

**Ответ:**

Устроение брака, иже бывает общим изволением от тех, иже входят в то достояние без всякия пакости, и благословением священническим [Злат. на енес. бес. 56]: егда себе обручают взаимно, веру честь, и любовь брачную соблюсти молитвою и благословением утвержено есть, и тайною именуется по реченному [ефес. глава 5]: тайна сия велика есть. таковое устройство брака и писание святое похваляет [евреем глава 13]: честен брак и ложе нескверно.

**Вопрос:**

Что или какия суть ползы сея тайны?

**Ответ:**

Первая польза есть [Злат. книга 1 о девстве], яко иже чистоты девства соблюдати не могут, то брака ради и всяко блудодеяния убегают, по реченному [1 кор. глава 7], обаче блудодеяния ради каждого свою жену да иметь, и каяждо жена своего мужа да иметь.

Другая полза яко рожьшиися дети от брака, не токмо честными глаголются, но и святыми суть.

Третьяя полза яко во всяких случаех и немощех, наипаче муж жене, и жена мужеви ближайшим суть, яко же святое писание учит [Мар. глава 10]: от зачала создания, мужа и жену сотворил я есть Бог: сего ради оставит человек отца своего и матери, и прилепится к жене своей, и будут оба в плоть едину. Четвертая полза, яко в устройении брака, по образу его живущии, ни единыя хулы от Бога и от человек приимут, ниже в совести скрупулу [обличение].

**Вопрос:**

Кий конец брака есть?

**Ответ:**

Конец есть сему браку, чтобы человеческий род умножался и число бы назнаменованных и избранных в царство небесное исполнилося [Быт. 1].

**Вопрос:**

Которая есть седмая тайна?

**Ответ:**

Помазание елеом с молитвою в немощи, отпущения ради

грехов, и здравия ради телеснаго [**Вас. ко Амфил. глава 27 о Святом Дусе**], якоже писание святое учит [**Мар. глава 6**]: бесы многи исцеляху, и мазаху маслом многи недужны, и исцелеваху. И инде [**Иаков 5**]: болит ли кто в вас, да призовет попы церковныя, и да молитву сотворят над ним, помазавше его маслом во имя Господне, и молитва веры спасет болящаго. и аще грехи будет сотворил, отпустятся ему.

**Вопрос:**

Како или что разумеется в сей тайне?

**Ответ:**

Первое дабы священници православныя веры были [**собор Карф.**].

Второе, дабы вещь належащая была еже есть масло, которое первоосвящено бывает от коего любо священника.

Третие, дабы немощный был, такоже православныя веры: и дабы прежде помазания маслом исповедался.

Четвертое, дабы молитва яже внегда помазуем бывает болящий глаголема была над ним, в нейже образ сея тайны воображается, рекше. Отче святыи врачу душам и телом, и прочая.

**Вопрос:**

Кии успех или полза есть тайны сея?

**Ответ:**

якоже выше указася от святаго Иакова, тако и ныне глаголю, яко отпущение бывает грехов, и исцеление телу [**1 кор. глава 11**].

**Вопрос:**

Которыи есть един надесятыи артикул?

**Ответ:**

Чаю воскресения мертвых.

**Вопрос:**

Многим ли вещем научает сей артикул?

**Ответ:**

Трем: Первей, яко известно и непременно имать быти из мертвых востание человеческим телесем, якоже благих, тако и злых, по реченному [**Иоан. глава 5**], не дивитеся сему яко

грядет час, воньже вси сущии во гробех услышат глас Сына Божия, и изыдут сотворши благая в воскрешение живота: а сотворши злая в воскрешение суда.

**Вопрос:**

Чесому второму научает сей артикул?

**Ответ:**

Учит якоже в сем сущем теле, в нем же живем в мире сем, в том и из мертвых востати имамы [**Дамаск. книга 4 глава 28**]: обаче уже то тело безсмертно будет, по реченному от апостола [**1 кор. глава 15**], подобает бо тлеемому сему облещися в нетление, и смертному сему облещися в бессмертие.

**Вопрос:**

Чесому третиemu научает сей артикул?

**Ответ:**

Учит, яко всякая душа к своему сущему телу обращена имать быти. и с ним вкупе или мзду или мучение вечное восприимет совершенно. прочее же тако подобает веровати о всех святых, по словеси святаго Иоанна Златоуста [**Злат. евреем глава 11 бес. 28**]: кроме Пресвятыя Богородицы. которая уже есть и с душою и с телом на небо взята.

**Вопрос:**

Чесого еще научюся от того артикула?

**Ответ:**

Научишися воспоминати всегда во уме, 4, вещи: яже суть, смерть, страшныи суд, мука вечная, и царство небесное [**Еклезиаст**]. яко да размышляя о том готов бы был на смерть, и на Страшном Суде не осужден, и в муку не ввержен, но в царстве небесном мог быти.

**Вопрос:**

Которыи есть двадесятии артикул веры?

**Ответ:**

И жизни будущаго века, аминь [**Иуда стих 24**].

**Вопрос:**

Чесому научает сей артикул?

**Ответ:**

Научает [Злат. к Феофил. глав. в лис. 5], яко вернии и избраннии Божии в будущем веце наследовати имут в царстве небесном вечный живот, утешение же и радость неизреченную, якоже святое писание учит [1 кор. глава 5]: ихже око не виде, и ухо не слыша и на сердце человеку не взыде, яже уготова Бог любящим Его. и инде [1 кор. глава 13]: видим убо ныне якоже зерцалом в гаданиих, тогда же лицем к лицу, ныне разумею отчасти, тогда же познаю якоже и познан бых.

**Вопрос:**

Что или кое утешение в царстве небесном?

**Ответ:**

Ни едино тамо утешение телесное и временное будет, по апостольскому речению. несть бо царство Божие брашно и питие, но правда и мир и радость о Духе Святе [рим. глава 14]. и инде [Матф. 24]: в воскресение бо ни женятся ни посягают но яко ангели Божии на небеси суть. таковое же утешение и радость не иметь конца в царстве небесном.

**Вопрос:**

Тожде ли утешение будет иметь душа и тело, или ни?

**Ответ:**

Душа яже вкупе с телом в настоящем житии благоугоди Богу, купно с телом и в будущем веце прославитися иметь. славою же подобни ангелом будут, и просветятся яко солнце по реченному [Матф. глава 13]: тогда праведници просветятся яко солнце в царствии Отца их. зачим и едино утешение и радость купно и неразделно восприимут, аминь.

**Вопрос:**

О осужденых же како имам разумети?

**Ответ:**

И тии также купно с душою и телом въвержени будут во огнь вечный, и тамо вовеки имут мучитися, по реченному Христом [Матф. глава 25]: идите от Мене проклятии во огнь вечный уготованныи диаволу, и агелом его. и инде [Мар. 9]: идеже червь их не умирает, и огнь не угасает.

**Вопрос:**

Будут ли имети конец себе осужденнии муками теми?

**Ответ:**

Никакоже [**Феофил. на Матф. глава 25**]: якоже бо иже на небеси суть вовеки нетленными суще, радости и утешения наслаждатися будут. тако и тии иже во аде суще, вовеки с душою и телом во огни без конца мучитися будут, и никогдаже съгорети имут.

## Книга Катихисис

### Другая часть о надежи.

**Вопрос:**

Что есть надежда?

**Ответ:**

Надежда есть истинное и несмущенное дерзновение, в Господе Бозе еже веровати, яко съспособлением Его получити имамы спасение вечное [**Вас. Вел. слово о подвиз.**]. и о всех тех вещех, о нихже Господа Бога с верою сгожающеся [**соединяющеся**] по воли Его святей да просим якоже писание святое учит [**евреом глава 10**]: не отложите убо надежди вашея, яже имать мздовоздаяние великое. и инде [**рим. глава 8**]: упование бо спасохомся. упование же видимо, несть упование. еже бо видит кто, что им уповаet.

**Вопрос:**

В чем належит надежда наша?

**Ответ:**

Надеждею нашею есть сам Господь Иисус Христос, якоже святыи апостол Павел научает, сице глаголя [**1 Тим. глава 1**], Павел посланник Иисус Христов, по повелению Бога Спаса нашего и Господа Иисуса Христа, упования нашего, и то в лепоту есть: понеже в Нем и Им живот вечныи, и всякая благодать даема бывает, якоже и писание святое сице глаголет [**Иуда ст. 20**]: вы же возлюбленнии, святою вашею верою, назидающе себе Духом Святым и молящеся, сами себе в любви Божии соблюдайте, ждуще милости Господа нашего Иисуса Христа в жизнь вечную.

**Вопрос:**

Что в надежди разумеется?

**Ответ:**

Две вещи разумеются, молитва Господня и блаженьства.

**Вопрос:**

Что есть молитва?

**Ответ:**

Молитва есть прошение с простотою от веры ко Господу

Богу, с надежею содержания Егоже просим, или прославляем, и благодарим.

**Вопрос:**

На много ли частей молитвы делятся?

**Ответ:**

На три: первая часть, еюже Господа Бога прославляем, величества Его ради и славы.

Вторая часть, егда о чем Господа Бога просим.

Третия часть есть, егда за прешедшая благодеяния Оного благодарствуем.

**Вопрос:**

Которая есть молитва известнейшая, и изряднейшая?

**Ответ:**

Молитва Господня, ейже сам Иисус Христос научи апостолы своя, и тако заповеда молитися глаголя, вы же сице молитеся, Отче наш иже еси, и прочая [**Матф. глава 6**].

**Вопрос:**

На много ли частей делится та молитва Господня?

**Ответ:**

На три части [**Феофил. на Матф. глава 6**]: первое есть предисловие, в нем же воображается к кому имам молитися. Другая часть, в ней же воображается дело, о котором просим или молим.

Третия часть есть, замкнение молитвы Господни, в ней же извещение есть, яко о чесом есмы просили, получить имамы то, силою и помощью Бога.

**Вопрос:**

Которое есть предисловие молитвы Господни?

**Ответ:**

Сие есть Отче наш иже еси на небесех.

**Вопрос:**

Чесому научаюся от того предисловия?

**Ответ:**

Первое познаеши, яко егда приступаеши Господу Богу молитися, тогда имаши быти в добром уготовании, мысли же и сердца, также и совести, дабы тебе та молитва пред Ним

приятна была.

потом себе познаем, яко сынове есмы Отца небеснаго по благодати. тем и просяще велико дерзновение к Нему имети имамы. а яко есмы сынове Божии, писание святое научает. елици же прияша Его, даст им область чадом Божиим быти, верующим во имя Его [**Иоан. глава 1**]. и инде [**гал. глава 4**]: да якоже есте сынове. посла Бог Духа Сына своего в сердца ваша, вопиюща авво Отче.

**Вопрос:**

Чесого еще от того научаюся?

**Ответ:**

Научаемся, яко вси имамы единаго Отца, иже нас ради, яко детей своих ради, все готов съи сотворити, якоже глаголет Христос [**Матф. глава 6**]: весть бо Отец ваш небесныи, яко требуете сих всех. и инде [**Матф. глава 23**]: не зовите себе отца на земли, един бо есть Отец ваш иже на небесех.

**Вопрос:**

Чесого больше научает то предисловие?

**Ответ:**

Учит того, дабы есмы единаго Отца имуще, вси вернии и избранныи Божии, исповедовали себе быти братиею, и друг за друга молилися по писанию [**Иаков глава 5**], молитися друг за друга, яко да исцелеете.

**Вопрос:**

Како имам о сем словеси разумети, еже на небесех?

**Ответ:**

Господь убо и Бог не точию на небеси, но и везде съи, и все исполняет. обаче особным образом и с болшою благодатию, на небеси пребывает, и тамо престол свой имать, якоже во псалмех глаголет [**псалом 102**]: Господь на небеси уготова престол свой, и царство Его всеми обладает.

**Вопрос:**

В другой части молитвы много ли прошений есть?

**Ответ:**

Седмь: Первое, да святится имя Твое.

**Вопрос:**

Что в себе заключает то прошение?

**Ответ:**

первее просим и молим Господа Бога дабы дал нам житие в благочестии препровождати, еже по воли Его и по благоволению жительствовати: им же бы имя Его святое прославляемо было, якоже сам научает [**Матф. глава 5; Злат. на Матф. глава 6 бес. 20; Феофил. там же**]: тако да просветится свет ваш пред человеки, яко да видят ваша добрыя дела, и прославят Отца вашего, иже есть на небесех.

**Вопрос:**

Чесому второму имам научитися от того прошения?

**Ответ:**

Научишися сему [**Нис. в слове 8 о мол. Господни**], яко да ни единия злобы сотвориши когда, также и прелести, имже бы имя Божие похулено было: яко да не будет речено и о тебе сице [**рим. глава 2**]: имя бо Божие вами хулился во языцах. и инде [**2 тит. глава 3**]: имуще образ благочестия, силы же его отвергшеся.

**Вопрос:**

Которое есть второе прошение?

**Ответ:**

Да приидет царствие Твое.

**Вопрос:**

Что заключает в себе то прошение?

**Ответ:**

Первее просим и молим, дабы в сердцы нашем пришед Господь Бог жительствовал благодатию и милостию своею, зачим имети нам правда, мир, и радость, а грех бы ктому не царствовал в сердцы нашем и теле, по апостольску учению [**рим. глава 6**]: да не царствует убо грех в мертвенем вашем теле, во еже послушати его в похотех его, ниже представляйте уды ваша оружия неправды греху, но представляйте себе Богови, яко от мертвых живы, и уды ваша оружия правды Богови.

**Вопрос:**

Что второе замыкается в том прошении?

**Ответ:**

Исповедуется се: дабы нам имеючи добру совесть, усердно Господа Бога молити, яко да даст нам христианьски разлучитися от телесе, и быти с собою всегда, якоже и апостол Павел глаголет о себе [**филип. 1**]: желание имыи разрешитися и со Христом быти много паче лучше. такоже просим, яко да и число избранных Божиих исполнится, и скорейше пришествие Христово быти могло, и воскресение мертвых. и дабы неприятель душ наших ктому уже в мире сем не царствовал, но Бог бы был во всех [**кор. глава 15**].

**Вопрос:**

Которое есть третие прошение?

**Ответ:**

Да будет воля Твоя, яко на небеси и на земли.

**Вопрос:**

Что заключается в том прошении?

**Ответ:**

В сем прошении первое просим Господа Бога [**Феофил. на Матф. глава 5**], дабы дал нам познати волю свою святую, яже есть воображена к заповедех Его святых и во всем учении Христа Господа, во евангелии описанном.

познавшим же нам волю Его исполняти бы помощью Его, по силе нашей, якоже сам Христос научает [**Иоан. глава 14**]: имея заповеди Моя и соблюдая их, той есть любяи мя. а любяи мя возлюблен будет Отцем Моим, и Аз возлюблю его, и явлюся ему сам.

**Вопрос:**

Чесому второму научитися имам от того прошения?

**Ответ:**

В том прошении просим Господа Бога, дабы якоже на небеси ангели исполняючи волю Божию во всем соединителне Его славят, сице бы и христиане на земли, в любви и соединении единеми усты, и единем сердцем Господа Бога прославляючи,

волю Его святую исполняли: о чесом на всякии день и православная церковь Господа Бога просит.

**Вопрос:**

Которое есть четвертое прошение?

**Ответ:**

Хлеб наш насущныи даждь нам днесъ.

**Вопрос:**

Что заключается в сем прошении?

**Ответ:**

В сем прошении первое просим и молим Господа Бога, дабы дал нам того хлеба, имже душа человеческая живет, рекше слышание слова Божия: о немже сам Христос тако глаголет [Матф. глава 4; Нис. слово 4 о молит. Господни; Злат. и Феофил. на мес. поменен.]: не о хлебе едином жив будет человек, но о всяком глаголе исходящем из уст Божиих.

Потом просим о другом хлебе, имже душа живет, дабы есмы достойне тела и крове Христовы причащатися имели, на вечное наше спасение. таковым хлебом самого себе называет Спаситель наш Христос [Иоан. глава 6]: Аз есмъ хлеб животныи, иже сшедши с небесе. аще кто снестъ от хлеба сего жив будет вовеки. и хлеб егоже аз дам плоть Моя есть, юже Аз дах за живот мира.

**Вопрос:**

Чесому еще от того прошения научитися имам?

**Ответ:**

Просим убо и о сем временном хлебе, дабы его нам дал в мире наслаждатися: а при хлебе и о всяких иных потребах без них же человек не может жити, обаче не преизлише. словом же днесъ, отдаляет излишнее попечение о временных вещех будущих: якоже на ином месте научает сице глаголя [Матф. глава 6]: не пецитесь убо на утреи, утреннии бо собою печется: довлеет дневи злоба его.

**Вопрос:**

Которое есть пятое прошение?

**Ответ:**

И остави нам долги наша, якоже и мы оставляем должником нашим.

**Вопрос:**

Что имеет в себе то прошение?

**Ответ:**

Первое в сем прошении просим [**Нис. о мол. Господни слово 5**], дабы вся грехи яже есмы по святом крещении сотворихом отпустил нам Бог, якоже и мы отпускаем должником нашим: по глаголющему словеси от Христа [**Матф. глава 6**]: аще бо отпускаете человеком согрешение их, отпустит и вам Отец ваш небесныи. аще ли не отпускаете человеком согрешения их, ни Отец ваш отпустит вам согрешении ваших.

**Вопрос:**

Которое есть шестое прошение?

**Ответ:**

И не введи нас во искушение.

**Вопрос:**

Что заключается в том прошении?

**Ответ:**

Первое в сем прошении просим Господа [**Нис. о мол. Господни, слово 5**], дабы вовремя егда неприятель на нас воюет, похотьми телесными и мирскими, неотступно благодатию своею святою нам помогал: понеже без Негоничесоже можем творити. якоже сам глаголет [**Иоан. глава 15**]: яко без Мене не можете творитиничесоже. немощи бо ради нашея сила Христова прославляема бывает, якоже ко апостолу Павлу рекл [**2 кор. глава 12**]: довлеет ти благодать Моя, сила бо Моя в немощи совершается.

**Вопрос:**

Очесом второе в сем прошении Господа Бога просим?

**Ответ:**

Просим [**Феофил. глава 6 на Матф.**], яко да всем врагом и гонителем церкви Христовы сердца смирити, и избавит нас от гонителей, и от злоказьства их от диявола умышленаго. аще ли когда и случится впасти во искушения, то дабы паче силы нашея не попущал нам искуситися по реченному [**1 кор.**

**глава 10]:** силен же Бог иже не оставит вас искуситися, паче еже можете, но сотворит со искущением и избытие, яко возмощи вам понести.

**Вопрос:**

Которое есть седьмое прошение?

**Ответ:**

Но избави нас от лукаваго.

**Вопрос:**

Что замыкается в том прошении?

**Ответ:**

В сем прошении просим и молим Господа Бога [Злат. на Матф. глава 6 бес. 12; Нис. о мол. Господни слово 5], дабы нас от сатаны защищал, которыи всякому злу есть начинатель, собою же и злыми человеки.

зде же просим дабы дал нам исправление житию, и престати от грехов: и удалил от нас за грехи уготованное нам мучение, временное же и вечное.

**Вопрос:**

Которая есть третия часть молитвы Господни?

**Ответ:**

Замыкание: яко Твое есть царство и сила и слава, вовеки, аминь.

**Вопрос:**

Что заключается в тех словах?

**Ответ:**

Тыя слова глаголати в конце сея молитвы сам Христос научил в Матфеи евангелисте [Злат. на Матф. глава 6, бес. 15], яже заключают в себе извещение сицевое: яко аще что просим по воли Божии, то все сотворити нам возможет Он: понеже сила и господство Его во всем мире есть: и то не тако нас деля грешных человек, якоже славы своея ради святыя. сего ради извещаемся от сего по воли Его святой просити, якоже Иоанн святыи научает нас сице глаголя [1 Иоан. глава 5]: и се есть дерзновение еже имамы к Нему, яко аще что просим по воли Его, послушает нас.

Аминь же полагается на концы ради того же извещения, яко тако, а не иначе есть.

**Вопрос:**

Много ли есть блаженств?

**Ответ:**

Христос в Матфеи евангелисте девять блаженств изчисляет [Матф. глава 5], якоже и Златоуст глаголет [Злат. на Матф. глава 5 бес. 15; Феофил. там же], Моисей в правде десять заповедей даде, Иисус же Господь Моисеев девять блаженств.

**Вопрос:**

Которое есть первое блаженство?

**Ответ:**

Блажени нищии духом, яко тех есть царство небесное [Той же Злат. на 1 кор. глава 15; Злат. на Матф. глава 5 бес. 15].

**Вопрос:**

Чего имам научитися в том блаженстве?

**Ответ:**

Научишися сему, яко нищета доброволная, яже от произволения человеческого сердца обретаемая воистину человека сотворит убогим и блаженным, то бо есть больше и богатства.

понеже и богатства ничтоже сему препинают к любви к Богу и ближнему: якоже творили первии христиане: иже имения своя продающе, и пред ногами апостольскими полагали сребро на строение убогим и неимущим братии [Деян. глава 4]: и ни един же от имения своего глаголаше свое быти, но бяху им вся обща.

**Вопрос:**

Которое есть второе блаженство?

**Ответ:**

Блажени плачующии, яко тии утешатся.

**Вопрос:**

Чего имам научитися в том блаженстве?

**Ответ:**

Научишися сему: яко тии поистине плачуще, иже пребывающе в мире сем, за грехи своя, и ближняго плачут.

такоже плачут и тии иже обиды приемлют от силнейших: якоже вдовы, сироты, и убозии човеци, и неведуюши о себе совестити [Злат. на Матф. глава 5 бес. 15; Феофил. там же; Нис. в слове 3 о блаженных].

плачующи иже ся, и сетуюши в работе у поганых, и терпящии гонение веры ради христианския: иже убо в мире сем блаженными суть, утешение имуще духовное: во оном же веце, истинное на небеси будут имети.

**Вопрос:**

Которое есть третие блаженство?

**Ответ:**

Блажени кротции, яко тии наследят землю.

**Вопрос:**

Чего имам научитися в том блаженстве?

**Ответ:**

Научишися [Нис. в слове 12 о блажен.], яко тии кротци суть, иже смиренно мудрствующе о себе, и не высящиеся над другими, естеством тела, именем, хитростию, и житием: но о всем в себе всегда слова Христова глаголюще, егда сотворите вся повеленная вам, глаголите, яко раби непотребни есмы, яко еже должни бехом сотворити, сотворихом.

**Вопрос:**

Которое есть четвертое блаженство?

**Ответ:**

Блажени алчующии и жаждущии правды, яко тии насытятся.

**Вопрос:**

Чего имам научитися в том блаженстве?

**Ответ:**

Научишися, яко тии суть влепоту блажени, яже по достоинству правду творящии.

такоже и тии блажени суть ихже неправедно осуждают и порицают егда они благодарне то терпяще Бога ради приемлют.

зде же имут научитися судии и властели, дабы правду всякому творили, аще хотят быти блаженными.

вспоминающе псаломская словеса [**псалом 9**]: суди сири и смирену, да не приложит потом величатися человек на земли. Такоже не имут погубити надежди и тии, иже алчют всегда правды, и не могут получити, ведуще пророческая словеса [**псалом 9**]: яко не доконца забвен будет нищии, и терпение убогих не погибнет доконца: но видяще лице Божие, насыщени будут правды, внегда явится им слава Его.

**Вопрос:**

Которое есть пятое блаженство?

**Ответ:**

Блажени милостивии яко тии помилованы будут.

**Вопрос:**

Которая суть дела милости?

**Ответ:**

Дела милости сугубы суть, едины телесныя, а другия душевныя [**Феофил. на Матф. глава 25**].

**Вопрос:**

Которая суть дела милости телесныя?

**Ответ:**

Седмь: ихже сам Христос изчисляти будет на судном дни [**Матф. глава 25**]: алчущаго накормити жаднаго напоити: нагаго одеяти: в темници суща посетити и утешити, немощнаго посетити, и советовати ему, еже к спасению ему належит, и к здравию телесному. странна суща, или того иже где не имать главы своея подклонити, в дом свой прияти, и построити его по силе своей, а его кондиции (исправлению). к темже шестим добродетелем и се надлежит, еже благодарне приемати в domы своя тех иже в путь шествующих обещавшихся на святая места, не оставляюще к сему и того еже бы убогим и неимущим, и бедным немощным, на осуждение наше по улицах лежати. но приемати их в domы своя, и служити им спасения ради души своея.

Седмое же дело милости, писание святое нам в Товии заповедует, умершаго погребсти, наипаче же тех, иже не оставиша ничтоже по себе, чим бы тело их погребсти, а при погребении просити и молити Господа Бога, за отпущение

грехов душам их. тако бо и ангел Рафаил к Товии глагола [Товия глава 12], когда молился еси со слезами, и погребал еси мертвяя, и оставил обед свой, мертвя скры в день в дому твоем, а в нощи погребе его, аз принесох молитву твою Господу Богу.

**Вопрос:**

Которая суть дела милости, належащия души?

**Ответ:**

Тая же седьмь: первое убо есть человека согрешающего от греха отвести, яко же святое писание учит [Иаков 5]: братие аще кто в вас заблудит от пути истины, и обратит кто его, да весть, яко обративши грешника от заблуждения пути его, и спасет душю от смерти, и покрыет множество грехов.

**Вопрос:**

Которое есть второе дело милости душевныя?

**Ответ:**

Неведущаго научити, первое воли и закону Божию, како имать жительствовати по христиански.  
потом како молитися Богу.

Третие, еже любо что к добруму житию належит, а ты что умеешь, ближняго своего без зависти научай, да не будеш осужден яко же и приемши един талант [Матф. глава 25].

**Вопрос:**

Которое третие дело милости душевныя?

**Ответ:**

Требующему совета, подати здравыи совет, яко же от заблуждения к правому пути. сице и ко всем добродетелем: яко же и выше речеся о сем, идеже о дарех Духа Святаго, учение бысть.

**Вопрос:**

Которое есть четвертое дело милости душевныя?

**Ответ:**

Господа Бога просити и молити, за всех иже во власти суть, и за желающих благодать и милость Божию получити: яко же пространнее имаши о сем обрести, и в заповедех церковных.

**Вопрос:**

Которое есть пятое дело, милости душевныя?

**Ответ:**

Сетующаго, или скорбящаго утешити, не точию словом добрым, но и делом.

**Вопрос:**

Которое есть шестое дело, милости душевныя?

**Ответ:**

Не попущати творити обид, также и правоверующих прельщатися от еретик, но всяко тщатися о взыскании и о навращении всякого, иже не есть в вере православней.

**Вопрос:**

Которое есть седьмое дело, милости душевныя?

**Ответ:**

Обиды, яже аще от кого любо яковым образом наносимыя нам, с радостию терпети, и презирати я, яко да Господь Бог грехи наша презрит.

сия же вся дела милости подобает нам, с великим прилежанием и усердием совершати, болшя ради мзды от Бога.

**Вопрос:**

Которое есть шестое блаженство?

**Ответ:**

Блажени чистии сердцем, яко тии Бога узрят.

**Вопрос:**

Чего научитися имам в том блаженстве?

**Ответ:**

Блажени суть тии, иже во всех добродетелех чистоту соблюдают, не точию телесную, но и сердечную, рекше ниже помыслом подвизающеся на всякую нечистоту: еюже и брак соблюдается [Феофил. на Матф. глава 5; Нис. слово 5 о блажен.].

**Вопрос:**

Которое есть седьмое блаженство?

**Ответ:**

Блажени миротворци, яко тии сынове Божии нарекутся.

**Вопрос:**

Чего научитися имам в сем блаженстве?

**Ответ:**

Первое сего блаженства причастници суть священники, иже жертвою безъкровною Бога к человеком примиряюще. тако же и мирстии благочестивии, иже молитвами своими милостища Бога сотворяюще ходатайствующе о ближних, к сему блажени суть и тии, иже межи людьми мир творящии: егда заступающе ходатайствуют, дабы въсue кровь христианская не проливалася.

**Вопрос:**

Которое есть осмое блаженство?

**Ответ:**

Блажени изгнани правды ради, яко тех есть царство небесное.

**Вопрос:**

Чего имам научитися в сем блаженстве?

**Ответ:**

В том блаженстве заключаются вси иже правду глаголюще, от людей приемлют гонение, якоже суть, учители, судии, и властели, егда правду глаголати имут, на нюже от человек злобу претерпят.

**Вопрос:**

Которое есть 9 блаженство?

**Ответ:**

Блажени есте егда поносят вам, и изженут и рекут всяк зол глагол на вы, лжуще мене ради. радуйтесь и веселитесь, яко мзда ваша многа есть на небесех.

**Вопрос:**

Чего научитися имам в сем блаженстве?

**Ответ:**

Сие блаженство ключается единем мучеником, и ко всем тем иже гонение терпят, егда им кто благочестие заграждает, церкви же и имение и волю отъемлет, от чинов и из градов изгоняет: иногда же неции веры ради и смерти предают.

## Книга Катихисис

### Другая часть о надежи.

**Вопрос:**

Что есть надежда?

**Ответ:**

Надежда есть истинное и несмущенное дерзновение, в Господе Бозе еже веровати, яко съспособлением Его получити имамы спасение вечное [**Вас. Вел. слово о подвиз.**]. и о всех тех вещех, о нихже Господа Бога с верою сгожающеся [**соединяющеся**] по воли Его святей да просим якоже писание святое учит [**евреом глава 10**]: не отложите убо надежди вашея, яже имать мздовоздаяние великое. и инде [**рим. глава 8**]: упование бо спасохомся. упование же видимо, несть упование. еже бо видит кто, что им уповаet.

**Вопрос:**

В чем належит надежда наша?

**Ответ:**

Надеждею нашею есть сам Господь Иисус Христос, якоже святыи апостол Павел научает, сице глаголя [**1 Тим. глава 1**], Павел посланник Иисус Христов, по повелению Бога Спаса нашего и Господа Иисуса Христа, упования нашего, и то в лепоту есть: понеже в Нем и Им живот вечныи, и всякая благодать даема бывает, якоже и писание святое сице глаголет [**Иуда ст. 20**]: вы же возлюбленнии, святою вашею верою, назидающе себе Духом Святым и молящеся, сами себе в любви Божии соблюдайте, ждуще милости Господа нашего Иисуса Христа в жизнь вечную.

**Вопрос:**

Что в надежди разумеется?

**Ответ:**

Две вещи разумеются, молитва Господня и блаженьства.

**Вопрос:**

Что есть молитва?

**Ответ:**

Молитва есть прошение с простотою от веры ко Господу

Богу, с надежею содержания Егоже просим, или прославляем, и благодарим.

**Вопрос:**

На много ли частей молитвы делятся?

**Ответ:**

На три: первая часть, еюже Господа Бога прославляем, величества Его ради и славы.

Вторая часть, егда о чем Господа Бога просим.

Третия часть есть, егда за прешедшая благодеяния Оного благодарствуем.

**Вопрос:**

Которая есть молитва известнейшая, и изряднейшая?

**Ответ:**

Молитва Господня, ейже сам Иисус Христос научи апостолы своя, и тако заповеда молитися глаголя, вы же сице молитеся, Отче наш иже еси, и прочая [**Матф. глава 6**].

**Вопрос:**

На много ли частей делится та молитва Господня?

**Ответ:**

На три части [**Феофил. на Матф. глава 6**]: первое есть предисловие, в нем же воображается к кому имам молитися. Другая часть, в ней же воображается дело, о котором просим или молим.

Третия часть есть, замкнение молитвы Господни, в ней же извещение есть, яко о чесом есмы просили, получити имамы то, силою и помощью Бога.

**Вопрос:**

Которое есть предисловие молитвы Господни?

**Ответ:**

Сие есть Отче наш иже еси на небесех.

**Вопрос:**

Чесому научаюся от того предисловия?

**Ответ:**

Первое познаеши, яко егда приступаеши Господу Богу молитися, тогда имаши быти в добром уготовании, мысли же и сердца, такоже и совести, дабы тебе та молитва пред Ним

приятна была.

потом себе познаем, яко сынове есмы Отца небеснаго по благодати. тем и просяще велико дерзновение к Нему имети имамы. а яко есмы сынове Божии, писание святое научает. елици же прияша Его, даст им область чадом Божиим быти, верующим во имя Его [**Иоан. глава 1**]. и инде [**гал. глава 4**]: да якоже есте сынове. посла Бог Духа Сына своего в сердца ваша, вопиюща авво Отче.

**Вопрос:**

Чесого еще от того научаюся?

**Ответ:**

Научаемся, яко вси имамы единаго Отца, иже нас ради, яко детей своих ради, все готов съи сотворити, якоже глаголет Христос [**Матф. глава 6**]: весть бо Отец ваш небесныи, яко требуете сих всех. и инде [**Матф. глава 23**]: не зовите себе отца на земли, един бо есть Отец ваш иже на небесех.

**Вопрос:**

Чесого больше научает то предисловие?

**Ответ:**

Учит того, дабы есмы единаго Отца имуще, вси вернии и избранныи Божии, исповедовали себе быти братиею, и друг за друга молилися по писанию [**Иаков глава 5**], молитися друг за друга, яко да исцелеете.

**Вопрос:**

Како имам о сем словеси разумети, еже на небесех?

**Ответ:**

Господь убо и Бог не точию на небеси, но и везде съи, и все исполняет. обаче особным образом и с болшою благодатию, на небеси пребывает, и тамо престол свой имать, якоже во псалмех глаголет [**псалом 102**]: Господь на небеси уготова престол свой, и царство Его всеми обладает.

**Вопрос:**

В другой части молитвы много ли прошений есть?

**Ответ:**

Седмь: Первое, да святится имя Твое.

**Вопрос:**

Что в себе заключает то прошение?

**Ответ:**

первее просим и молим Господа Бога дабы дал нам житие в благочестии препровождати, еже по воли Его и по благоволению жительствовати: им же бы имя Его святое прославляемо было, якоже сам научает [**Матф. глава 5; Злат. на Матф. глава 6 бес. 20; Феофил. там же**]: тако да просветится свет ваш пред человеки, яко да видят ваша добрыя дела, и прославят Отца вашего, иже есть на небесех.

**Вопрос:**

Чесому второму имам научитися от того прошения?

**Ответ:**

Научишися сему [**Нис. в слове 8 о мол. Господни**], яко да ни единия злобы сотвориши когда, также и прелести, имже бы имя Божие похулено было: яко да не будет речено и о тебе сице [**рим. глава 2**]: имя бо Божие вами хулился во языщех. и инде [**2 тит. глава 3**]: имуще образ благочестия, силы же его отвергшеся.

**Вопрос:**

Которое есть второе прошение?

**Ответ:**

Да приидет царствие Твое.

**Вопрос:**

Что заключает в себе то прошение?

**Ответ:**

Первее просим и молим, дабы в сердцы нашем пришед Господь Бог жительствовал благодатию и милостию своею, зачим имети нам правда, мир, и радость, а грех бы ктому не царствовал в сердцы нашем и теле, по апостольску учению [**рим. глава 6**]: да не царствует убо грех в мертвенем вашем теле, во еже послушати его в похотех его, ниже представляйте уды ваша оружия неправды греху, но представляйте себе Богови, яко от мертвых живы, и уды ваша оружия правды Богови.

**Вопрос:**

Что второе замыкается в том прошении?

**Ответ:**

Исповедуется се: дабы нам имеючи добру совесть, усердно Господа Бога молити, яко да даст нам христианьски разлучитися от телесе, и быти с собою всегда, якоже и апостол Павел глаголет о себе [**филип. 1**]: желание имыи разрешитися и со Христом быти много паче лучше. такоже просим, яко да и число избранных Божиих исполнится, и скорейше пришествие Христово быти могло, и воскресение мертвых. и дабы неприятель душ наших ктому уже в мире сем не царствовал, но Бог бы был во всех [**кор. глава 15**].

**Вопрос:**

Которое есть третие прошение?

**Ответ:**

Да будет воля Твоя, яко на небеси и на земли.

**Вопрос:**

Что заключается в том прошении?

**Ответ:**

В сем прошении первое просим Господа Бога [**Феофил. на Матф. глава 5**], дабы дал нам познати волю свою святую, яже есть воображена к заповедех Его святых и во всем учении Христа Господа, во евангелии описанном.

познавшим же нам волю Его исполняти бы помощью Его, по силе нашей, якоже сам Христос научает [**Иоан. глава 14**]: имея заповеди Моя и соблюдая их, той есть любяи мя. а любяи мя возлюблен будет Отцем Моим, и Аз возлюблю его, и явлюся ему сам.

**Вопрос:**

Чесому второму научитися имам от того прошения?

**Ответ:**

В том прошении просим Господа Бога, дабы якоже на небеси ангели исполняючи волю Божию во всем соединителне Его славят, сице бы и христиане на земли, в любви и соединении единеми усты, и единем сердцем Господа Бога прославляючи,

волю Его святую исполняли: о чесом на всякии день и православная церковь Господа Бога просит.

**Вопрос:**

Которое есть четвертое прошение?

**Ответ:**

Хлеб наш насущныи даждь нам днесь.

**Вопрос:**

Что заключается в сем прошении?

**Ответ:**

В сем прошении первое просим и молим Господа Бога, дабы дал нам того хлеба, имже душа человеческая живет, рекше слышание слова Божия: о немже сам Христос тако глаголет [Матф. глава 4; Нис. слово 4 о молит. Господни; Злат. и Феофил. на мес. поменен.]: не о хлебе едином жив будет человек, но о всяком глаголе исходящем из уст Божиих.

Потом просим о другом хлебе, имже душа живет, дабы есмы достойне тела и крове Христовы причащатися имели, на вечное наше спасение. таковым хлебом самого себе называет Спаситель наш Христос [Иоан. глава 6]: Аз есмъ хлеб животныи, иже сшедши с небесе. аще кто снестъ от хлеба сего жив будет вовеки. и хлеб егоже аз дам плоть Моя есть, юже Аз дах за живот мира.

**Вопрос:**

Чесому еще от того прошения научитися имам?

**Ответ:**

Просим убо и о сем временном хлебе, дабы его нам дал в мире наслаждатися: а при хлебе и о всяких иных потребах без них же человек не может жити, обаче не преизлише. словом же днесь, отдаляет излишнее попечение о временных вещех будущих: якоже на ином месте научает сице глаголя [Матф. глава 6]: не пецитесь убо на утреи, утреннии бо собою печется: довлеет дневи злоба его.

**Вопрос:**

Которое есть пятое прошение?

**Ответ:**

И остави нам долги наша, якоже и мы оставляем должником нашим.

**Вопрос:**

Что имеет в себе то прошение?

**Ответ:**

Первое в сем прошении просим [**Нис. о мол. Господни слово 5**], дабы вся грехи яже есмы по святому крещении сотворихом отпустил нам Бог, якоже и мы отпускаем должником нашим: по глаголющему словеси от Христа [**Матф. глава 6**]: аще бо отпускаете человеком согрешение их, отпустит и вам Отец ваш небесныи. аще ли не отпускаете человеком согрешения их, ни Отец ваш отпустит вам согрешений ваших.

**Вопрос:**

Которое есть шестое прошение?

**Ответ:**

И не введи нас во искушение.

**Вопрос:**

Что заключается в том прошении?

**Ответ:**

Первое в сем прошении просим Господа [**Нис. о мол. Господни, слово 5**], дабы вовремя егда неприятель на нас воюет, похотьми телесными и мирскими, неотступно благодатию своею святою нам помогал: понеже без Негоничесоже можем творити. якоже сам глаголет [**Иоан. глава 15**]: яко без Мене не можете творитиничесоже. немощи бо ради нашея сила Христова прославляема бывает, якоже ко апостолу Павлу рекл [**2 кор. глава 12**]: довлеет ти благодать Моя, сила бо Моя в немощи совершается.

**Вопрос:**

Очесом второе в сем прошении Господа Бога просим?

**Ответ:**

Просим [**Феофил. глава 6 на Матф.**], яко да всем врагом и гонителем церкви Христовы сердца смирити, и избавит нас от гонителей, и от злоказнъства их от диявола умышленаго. аще ли когда и случится впасти во искушения, то дабы паче силы нашея не попущал нам искуситися по реченному [**1 кор.**

**глава 10]:** силен же Бог иже не оставит вас искуситися, паче еже можете, но сотворит со искущением и избытие, яко возмощи вам понести.

**Вопрос:**

Которое есть седьмое прошение?

**Ответ:**

Но избави нас от лукаваго.

**Вопрос:**

Что замыкается в том прошении?

**Ответ:**

В сем прошении просим и молим Господа Бога [Злат. на Матф. глава 6 бес. 12; Нис. о мол. Господни слово 5], дабы нас от сатаны защищал, которыи всякому злу есть начинатель, собою же и злыми человеки.

зде же просим дабы дал нам исправление житию, и престати от грехов: и удалил от нас за грехи уготованное нам мучение, временное же и вечное.

**Вопрос:**

Которая есть третия часть молитвы Господни?

**Ответ:**

Замыкание: яко Твое есть царство и сила и слава, вовеки, аминь.

**Вопрос:**

Что заключается в тех словах?

**Ответ:**

Тыя слова глаголати в конце сея молитвы сам Христос научил в Матфеи евангелисте [Злат. на Матф. глава 6, бес. 15], яже заключают в себе извещение сицевое: яко аще что просим по воли Божии, то все сотворити нам возможет Он: понеже сила и господство Его во всем мире есть: и то не тако нас деля грешных человек, якоже славы своея ради святыя. сего ради извещаемся от сего по воли Его святой просити, якоже Иоанн святыи научает нас сице глаголя [1 Иоан. глава 5]: и се есть дерзновение еже имамы к Нему, яко аще что просим по воли Его, послушает нас.

Аминь же полагается на концы ради того же извещения, яко тако, а не иначе есть.

**Вопрос:**

Много ли есть блаженств?

**Ответ:**

Христос в Матфеи евангелисте девять блаженств изчисляет [Матф. глава 5], якоже и Златоуст глаголет [Злат. на Матф. глава 5 бес. 15; Феофил. там же], Моисей в правде десять заповедей даде, Иисус же Господь Моисеев девять блаженств.

**Вопрос:**

Которое есть первое блаженство?

**Ответ:**

Блажени нищии духом, яко тех есть царство небесное [Той же Злат. на 1 кор. глава 15; Злат. на Матф. глава 5 бес. 15].

**Вопрос:**

Чего имам научитися в том блаженстве?

**Ответ:**

Научишися сему, яко нищета доброволная, яже от произволения человеческого сердца обретаемая воистину человека сотворит убогим и блаженным, то бо есть больше и богатства.

понеже и богатства ничтоже сему препинают к любви к Богу и ближнему: якоже творили первии христиане: иже имения своя продающе, и пред ногами апостольскими полагали сребро на строение убогим и неимущим братии [Деян. глава 4]: и ни един же от имения своего глаголаше свое быти, но бяху им вся обща.

**Вопрос:**

Которое есть второе блаженство?

**Ответ:**

Блажени плачующии, яко тии утешатся.

**Вопрос:**

Чего имам научитися в том блаженстве?

**Ответ:**

Научишися сему: яко тии поистине плачуще, иже пребывающе в мире сем, за грехи своя, и ближняго плачут.

такоже плачут и тии иже обиды приемлют от силнейших: якоже вдовы, сироты, и убозии человеци, и неведующии о себе совестити [Злат. на Матф. глава 5 бес. 15; Феофил. там же; Нис. в слове 3 о блаженных].

плачующиижеся, и сетующи в работе у поганых, и терпящии гонение веры ради христианския: иже убо в мире сем блаженными суть, утешение имуще духовное: во оном же веце, истинное на небеси будут имети.

**Вопрос:**

Которое есть третие блаженство?

**Ответ:**

Блажени кротции, яко тии наследят землю.

**Вопрос:**

Чего имам научитися в том блаженстве?

**Ответ:**

Научишися [Нис. в слове 12 о блажен.], яко тии кротци суть, иже смиренно мудрствующе о себе, и не высящеся над другими, естеством тела, именiem, хитростию, и житием: но о всем в себе всегда слова Христова глаголюще, егда сотворите вся повеленная вам, глаголите, яко раби непотребни есмы, яко еже должни бехом сотворити, сотворихом.

**Вопрос:**

Которое есть четвертое блаженство?

**Ответ:**

Блажени алчующии и жаждущии правды, яко тии насытятся.

**Вопрос:**

Чего имам научитися в том блаженстве?

**Ответ:**

Научишися, яко тии суть влепоту блажени, яже по достоинству правду творящии.

такоже и тии блажени суть ихже неправедно осуждают и порицают егда они благодарне то терпяще Бога ради приемлют.

зде же имут научитися судии и властели, дабы правду всякому творили, аще хотят быти блаженными.

вспоминающе псаломская словеса [**псалом 9**]: суди сири и смирену, да не приложит потом величатися человек на земли. Такоже не имут погубити надежди и тии, иже алчют всегда правды, и не могут получити, ведуще пророческая словеса [**псалом 9**]: яко не доконца забвен будет нищии, и терпение убогих не погибнет доконца: но видяще лице Божие, насыщени будут правды, внегда явится им слава Его.

**Вопрос:**

Которое есть пятое блаженство?

**Ответ:**

Блажени милостивии яко тии помиловани будут.

**Вопрос:**

Которыя суть дела милости?

**Ответ:**

Дела милости сугубы суть, едины телесныя, а другия душевныя [**Феофил. на Матф. глава 25**].

**Вопрос:**

Которыя суть дела милости телесныя?

**Ответ:**

Седмь: ихже сам Христос изчисляти будет на судном дни [**Матф. глава 25**]: алчущаго накормити жаднаго напоити: нагаго одеяти: в темници суща посетити и утешити, немощнаго посетити, и советовати ему, еже к спасению ему належит, и к здравию телесному. странна суща, или того иже где не имать главы своея подклонити, в дом свой прияти, и построити его по силе своей, а его кондиции (исправлению). к темже шестим добродетелем и се надлежит, еже благодарне приемати в domы своя тех иже в путь шествующих обещавшихся на святая места, не оставляюще к сему и того еже бы убогим и неимущим, и бедным немощным, на осуждение наше по улицах лежати. но приемати их в domы своя, и служити им спасения ради души своея.

Седмое же дело милости, писание святое нам в Товии заповедует, умершаго погребсти, наипаче же тех, иже не оставиша ничтоже по себе, чим бы тело их погребсти, а при погребении просити и молити Господа Бога, за отпущение

грехов душам их. тако бо и ангел Рафаил к Товии глагола [Товия глава 12], когда молился еси со слезами, и погребал еси мертвяя, и оставил обед свой, мертвя скры в день в дому твоем, а в нощи погребе его, аз принесох молитву твою Господу Богу.

**Вопрос:**

Которая суть дела милости, належащия души?

**Ответ:**

Тая же седьмь: первое убо есть человека согрешающего от греха отвести, якоже святое писание учит [Иаков 5]: братие аще кто в вас заблудит от пути истины, и обратит кто его, да весть, яко обративши грешника от заблуждения пути его, и спасет душю от смерти, и покрыет множество грехов.

**Вопрос:**

Которое есть второе дело милости душевныя?

**Ответ:**

Неведущаго научити, первое воли и закону Божию, како имать жительствовати по христиански.  
потом како молитися Богу.

Третие, еже любо что к добруму житию належит, а ты что умеешь, ближняго своего без зависти научай, да не будеш осужден якоже иже и приемши един талант [Матф. глава 25].

**Вопрос:**

Которое третие дело милости душевныя?

**Ответ:**

Требующему совета, подати здравыи совет, якоже от заблуждения к правому пути. сице и ко всем добродетелем: якоже и выше речеся о сем, идеже о дарех Духа Святаго, учение бысть.

**Вопрос:**

Которое есть четвертое дело милости душевныя?

**Ответ:**

Господа Бога просити и молити, за всех иже во власти суть, и за желающих благодать и милость Божию получити: якоже пространнее имаши о сем обрести, и в заповедех церковных.

**Вопрос:**

Которое есть пятое дело, милости душевныя?

**Ответ:**

Сетующаго, или скорбящаго утешити, не точию словом добрым, но и делом.

**Вопрос:**

Которое есть шестое дело, милости душевныя?

**Ответ:**

Не попущати творити обид, также и правоверующих прельщатися от еретик, но всяко тщатися о взыскании и о навращении всякого, иже не есть в вере православней.

**Вопрос:**

Которое есть седьмое дело, милости душевныя?

**Ответ:**

Обиды, яже аще от кого любо яковым образом наносимыя нам, с радостию терпети, и презирати я, яко да Господь Бог грехи наша презрит.

сия же вся дела милости подобает нам, с великим прилежанием и усердием совершати, болшя ради мзды от Бога.

**Вопрос:**

Которое есть шестое блаженство?

**Ответ:**

Блажени чистии сердцем, яко тии Бога узрят.

**Вопрос:**

Чего научитися имам в том блаженстве?

**Ответ:**

Блажени суть тии, иже во всех добродетелех чистоту соблюдают, не точию телесную, но и сердечную, рекше ниже помыслом подвизающеся на всякую нечистоту: еюже и брак соблюдается [Феофил. на Матф. глава 5; Нис. слово 5 о блажен.].

**Вопрос:**

Которое есть седьмое блаженство?

**Ответ:**

Блажени миротворци, яко тии сынове Божии нарекутся.

**Вопрос:**

Чего научитися имам в сем блаженстве?

**Ответ:**

Первое сего блаженства причастници суть священники, иже жертвою безъкровною Бога к человеком примиряюще. тако же и мирстии благочестивии, иже молитвами своими милостища Бога сотворяюще ходатайствующе о ближних, к сему блажени суть и тии, иже межи людьми мир творящии: егда заступающе ходатайствуют, дабы въсue кровь христианская не проливалася.

**Вопрос:**

Которое есть осмое блаженство?

**Ответ:**

Блажени изгнани правды ради, яко тех есть царство небесное.

**Вопрос:**

Чего имам научитися в сем блаженстве?

**Ответ:**

В том блаженстве заключаются вси иже правду глаголюще, от людей приемлют гонение, якоже суть, учители, судии, и властели, егда правду глаголати имут, на нюже от человек злобу претерпят.

**Вопрос:**

Которое есть 9 блаженство?

**Ответ:**

Блажени есте егда поносят вам, и изженут и рекут всяк зол глагол на вы, лжуще мене ради. радуйтесь и веселитесь, яко мзда ваша многа есть на небесех.

**Вопрос:**

Чего научитися имам в сем блаженстве?

**Ответ:**

Сие блаженство ключается единем мучеником, и ко всем тем иже гонение терпят, егда им кто благочестие заграждает, церкви же и имение и волю отъемлет, от чинов и из градов изгоняет: иногда же неции веры ради и смерти предают.

**Святаго Генадия, патриарха Константинопольскаго.  
О вере: еже убо православную веру имети, основание  
добрых дел есть, темже от веры начнется слово.**

*Глава 1*

Веруй во Отца, и Сына, и Святаго Духа, Троицу неразделну, и неслиянну, единобожественну. Отца нерожденна. Сына же рождена, а не созданна. Духа Святаго нерожденна несозданна, но исходяща.

Три в единой воли, и едину славу, едину честь, едино поклонение, от всяя твари, от ангел, и от человек приемлюшу, превечну, и безконечну, пребывающую вовеки.

*Глава 2*

Воплощенна же Сына Божия веруй истинносущна, а не привидением во две естестве Божество и человечество. Бога по Божеству, и человека по вочеловечению, и во обоем совершенна.

*Глава 3*

Рождьшую Его матерь, Богородицу нарицай, девицу сущу и матерь, веруй яко роди Христа и воздои. деву же яко девою пребысть, и по рожестве пребывает.

*Глава 4*

Кресту Христову с верою покланяйся, яко на том спасение всем человеком содела Господь.

*Глава 5*

Иконе же Христове, и пречистыя матере Его, и всех святых Его честь с верою воздавай, яко к самым любовно глаголи в молитве.

веден бысть на жертву Христос яко агнец незлобив Еммануил, на заклание волное. приидите воспойте, и поклонитеся на кресте повешенному животу безконечному.

*Глава 6*

Святых же всех угождьших Господу, моли, яко помощники сущия и заступники, притекающими к ним, понеже прияша дерзновение к Богу яко угоднии раби к своему Господину.

## *Глава 7*

Мощи же святых с верою целуй, и честь воздавай им яко честным, понеже Христа ради пострадаша.

## *Глава 8*

Тайнам Божиим веруй, телу и крови Христове и причащайся со страхом, да причастник будеши царству Его небесному.

## *Глава 9*

Неверство же отметай, и не рцы како хлеб, тело: и вино, кровь. но слыши, яко невозможна ничтоже от человек от Бога же вся возможна.

## *Глава 10*

Веруй воскресению мертвых, и жизни будущаго века, по неизреченному словеси Господню, еже в евангельском писании слышиши учение.

## *Глава 11*

Помни суд, чай ответа, и возъдаяния по делом, веруй яко будет, и будет.

## *Глава 12*

Посем же возлюби Господа Бога твоего от всея души твоей и крепости, и подвигни вся твоя дела и прочая нравы к Того угоджению.

## *Глава 13*

Паки возлюби искреняго своего, с Ним же в единой купели породися, сиречь, всякаго христианина, паче же брата. рече бо Господь, яко восхожду ко Отцу Моему, и Отцу вашему.

## *Глава 14*

Страх Божии выну в сердцы имей, и памятуй яко ту сущу Богу с тобою и на всяком месте, где идеши или седиши.

## *Глава 15*

Страхом Его, яко уздою обрати ум свой, и истязайся по вся часы, еда без востягновения ходя пустошных научишися.

## *Глава 16*

Поклоняй главу свою всякому старейшему тебе, смиренным разумом, смиренныя воздвигнеши.

## *Глава 17*

Други своя равныя тебе с любовию усретай, и с обнятием целование дай им, яко Елисавефь Марии.

## *Глава 18*

Меншия тебе и малыя верстою, любовию восприимай и помилуй, и к Богу воздохни о них, яко новоначенших их познати Бога.

## *Глава 19*

Царя бойся всею силою своею, не есть бо страх его на пагубу души, но паче научишися от того, боятися Бога.

## *Глава 20*

Небрежение бо о властелех, небрежение о самом Бозе, еже на власть земную учиненнаго. видимаго бо владыки не боятися, како может боятися невидимаго Бога.

## *Глава 21*

Боитися ученик учителева жезла, паче же самого учителя. такожде боянися царя, боится и Бога, имже казняться согрешающии. царь бо есть Божий слуга, человеком милостию и казнию.

## *Глава 22*

Посем всякому богатому главу свою поклоняй смирения ради. древо бо многоветвенно подклонением подойдеши, и мимо идеши.

## *Глава 23*

Приемляи бо власть от царя своего, от подруг своих славы требует, а от менших поклонения просит.

## *Глава 24*

Простейшаго во всем ищи, и в брашне и во одежди. не стыдися нищетою, ибо большая часть мира сего в нищете ходит.

## *Глава 25*

И не рцы богата мужа сын есь срам ми есть, никто же бо богатейша Христа Отца твоего небеснаго, родившаго тя во святой купели, и в нищете ходившаго, не имуща где главы подклонити.

## *Глава 26*

Правдою украшайся, ко всякому тщися истинное отвещати, и не мози устыдеся лица, и лжи послух быти.

## *Глава 27*

Пред царем бойся лжю глаголати, ибо погубит Господь глаголющыя лжю. но с покорением отвещай ему, яко самому Богу.

## *Глава 28*

Аще бо вовремя неистинно что возглаголеши, а тебе не сведущу. Бога бойся, еда не искушает тя: блюдеши ли своея души, аще явишися неистинствуяи, и не можеши уверитися ему, яко блюдеши онаго души.

## *Глава 29*

Аще право изглаголеши, и впадеши в гнев от кого любо, не скорби о том: но паче утешайся реченным от Господа: блажени изgnани правды ради, яко тех есть царство небесное.

## *Глава 30*

Кроток буди ко всякому человеку, и к старейшим тебе и к меньшим. лицемерная бо кротость, еже больших устыжатися, меньших же озлобляти.

## *Глава 31*

Кротко ступание, кротко седание, кроток взор, кротко слово, вся сия тебе да будут, от сих бо истинныи христианин явишися.

## *Глава 32*

Кротость же еже недосадити никомуже, ни в словеси, ни в деле, ни в повелении, но всякому человеку нравы своими сладит сердце.

## *Глава 33*

Ум свой присно от суетных мыслей встягай, и воспушай горе к Богу, сим бо на стязю подвига уступаеши, душю же из разслабления свобождаеши.

## *Глава 34*

Не есть дивно низпадати человеческому естеству к земным, но еже падши не встати. кто бо заблудит от пути, не ищет ли

его? разслаблен ли есть отчаянием день, утрешний день, подвига отдаждь.

### *Глава 35*

Славы земныя, ни в коем же деле похоши. слава бо земная угасает любящим ю, возвеявши вовремя человеку яко буря ветреная, плод добрых дел его отъемши, вскоре отшедши посмеется неразумию его.

### *Глава 36*

Неразумие бо есть приходящим благостыням вечным, даром благаго Бога, еже непождати терпением и верою, но о земных обрадоватися, и тех прияти аки неверующему воскресению.

### *Глава 37*

Аще бы слава всего мира приближилася славе небесней, не быша сынове мира сего распяли Господа славы. кии бо раб дерзнет в том дому обитати, идеже господина его не прияша.

### *Глава 38*

Бесчестие любви, аки чашю пельяню приими. аще бо пространно ти есть, но на прогнание греховнаго недуга, грех убо сладостию внидет, горестию же изыдет.

### *Глава 39*

Желая вечныя радости, худе земным причащается, выну мысля о исходе своем. не стужает ему человеческое поношение, яко Господь пришед в мир, и сей претерпе бесчестие от раба своего.

### *Глава 40*

Иже хощет славен быти в сем мире, той бесчестия не терпит, веру же держаи безславие любит. помышляй реченное от Господа, како может веровати, славу от человек приемляи, славы же не искии от единороднаго.

### *Глава 41*

Алчбу и жажду, Христа ради люби, и елико пакость телу твориши, души благодать твориши, воздаяния бо суть противу делом, воздаст паки благая за мало, егоже ради потерпим с радостию.

## *Глава 42*

С мучеными Христа ради хоти ликовствовати. предай же тело на пост, и волю на попрание, утробу на алчбу, сердце на крепость, кровь на пролитие изверзи. аще не вне, то внутрь изсуши ю сухотою яди, яко да приимеши обещанная благая.

## *Глава 43*

Веси, яко призывающий царя очищают полаты, и ты аще хощеши желанием небеснаго Царя в дом свой прияти, света ради души твоей, очисти тело постом: истреби жаждею: украси смирением: и накади благоуханною молитвою.

## *Глава 44*

Молитвы душевныя пиши не отлагай, якоже бо тужит тело пищи лишаемо, тако и душа молитвенныя пищи лишаема, к разслаблению, и умерщвению умному приближается.

## *Глава 45*

Свет убо в храмине свеча, свет же в чувстве молитvenный разум, ясен свет от свечи, не сущу вмесу никоемуже. светла же зело молитва непримесна мыслем земным.

## *Глава 46*

Храни свещю от ветра, молитву же от лености, украси ю яко невесту бдением, трудом, и терпением, да похощет ея Царь небесный.

## *Глава 47*

Предай же хотение свое Богу ведущему вся, яже прежде бытия человеку, и не проси воли твойей быти, всякаго бо человека мысли неполезны, но глаголи к Богу да будет воля Твоя, Той бо творит вся на ползу нам, ихже мы плотнии не вемы.

## *Глава 48*

Востони аки мытарь: прибегни аки блудныи: умилися аки Ахав: прослезися яко блудница: зови яко хананея: предъстой яко вдовица: молися яко Езекия: смирися яко Манасия. аще тако молишися, примет благии Господь молитву твою, аки мати младенца.

### *Глава 49*

Тайно место обрет, и сед с тихостию, помяни си грехи, и отпадения царствия небеснаго, и умилися сердцем, и образом: и преклонши главу, рцы с стенанием, горе мне яко пришельствие мое удалися, да кто даст главе моей воду, и очима моима источник слез. увы мне яко близ день.

### *Глава 50*

Слез ли не имаши, не отчайся, воздыхай же часто и тяжко, от всего сердца. слезы бо суть Божий дар. и помалу воздыханием, и умилением, испросиши у Бога. писано бо есть: ищаи обрящет. просия приемлет: и толкующему отверзается.

### *Глава 51*

Обрет слезы храни я всею силою своею, от объядения, и пиянства, паче же от осуждения всякаго человека. своему бо делу зазирай, человека же егоже созда Бог, не суди.

### *Глава 52*

Неверуй ни своима очима, аще видиши согрешающа кого, яко и та неверна еста, первое бо в раи очи соблазниста, и падение нам от восора бысть.

### *Глава 53*

Безгрешнаго есть дело грехом судити. кто же без греха, разве един Бог, Той бо един не измерен, и Тому подобает судити сущым под мерою.

### *Глава 54*

Иже бо имеет на ребрах своих язву гноя, нечистотою чужею не гнущается: помышляя выну о множестве грехов своих, николиже о дружнем соблазне беседу составити хощет.

### *Глава 55*

Еже судити человеку соблазнившуся, гордость есть и самомнение, Бог же гордым противится. а иже по вся часы ответ дати о своих грехах чает, не скоро главу возведет чужих соблазн смотрити.

## *Глава 56*

Не буди горд, да не похвалится гроб, твою гордость держай, и убогий почиет на гробе твоем до полудни. и никоего вреда приимет.

## *Глава 57*

Червь смирен зело и худ, ты же славен и горд. но аще разумен еси, то сам уничижи гордость свою, помышляй я яко крепость твоя и силы, червем снедь будет.

## *Глава 58*

Помяни первыя прослывшая во храбрстве, в богатстве же, и силе, и славе, яко безвести отпадоша, и без памяти быша. худии же и убозии в мире сем, о души своей подвигшися, како на небесех прославлени, и на земли хвалимы, и на помошь призываляемы.

## *Глава 59*

Видев мертвца несома аки свое естество помилуй, и последуй ему до гроба, двое бо благодеяние приимеши оного ради смерти. свою кончину помянеши, и смиришися; и паки тело его помиловав, гробу предай, и сам помилован будеши.

## *Глава 60*

Болящаго посети, и неси ему егоже желает вкусити, сам же послужи ему, аки своему сроднику. ведыи яко и ты имаша такожде пострадати.

## *Глава 61*

Стенящему иному тяжко от болезни, и ты жалостныя слезы испусти, и воздохни к Богу о обиде его, в ней же есть. аще врачъ прилучится, и ты дажь цену за исцеление его.

## *Глава 62*

Умирающу же ему: ты своими руками очи ему стисни и уста, и к Богу о души его всем сердцем помолися, и омый руками своими. аще же убог есть, потщися не нага его погребсти.

## *Глава 63*

Дело бо спешно покаянию и слезам, пощение умирающих, кто бо тогда не приидет во умиление, видя естество свое во гроб входящее, и имя его угасше, славу же и богатство во тму сошедшу.

## *Глава 64*

Аще имаши дерзновение к царю и властилем, поскорби о обидимом от силнаго. и до пота побори по сироте, да вменит Господь каплю пота твоего с кровию мученическою.

## *Глава 65*

Аще ли не знаем еси царем то к тем иже имут дерзновение к нему, потужи о убозем, и Господь равно первому се вменит.

## *Глава 66.*

Приклони ухо твое к просящему, и обнищавшему в житии сем, исполні своим изъобилием онаго недостаточную нищету.

## *Глава 67*

Возведи очи милостивно на седящаго в наготе, и зимою трясущагося, понудися естество свое прикрыти, одежею лежашею у тебе, и Господь даст ти паки сторицею, и жизнь вечную.

## *Глава 68*

Простри руку скитающемся по улицах и введи такового во обитель свою. общ ти буди с ним хлеб твой. обща чаша воды, или питие, еже ти Бог дал.

## *Глава 69*

Странна введи в дом, и безкровнаго, в под кров твой, даждь мокнувшему сухоту: иззябшему теплоту: омыи скверну тела его яко убог есть, и достоин помилования.

## *Глава 70*

Посети сущих в темницах, по Господню повелению, виждь беды их и страсти, и воздохни о них, и рци ох мне; сии за едино согрешение страждут, аз же по вся часы Владыце моему Христу согрешаю и в легкоте пребываю.

## *Глава 71*

Аще видиши кого от них по оклеветанию страждуща, помози ему Христа ради, и яви истину к ним же оклеветан бысть, иного спасения несть ближша сущим у царя и у велмож, разве яже обидимыя избавляти.

## *Глава 72*

Седящу ти над многоразличною трапезою, помяни сух хлеб ядущаго, и немогущаго воды принести недуга ради.

## *Глава 73*

Питай тело свое, дажь часть от трапезы твоей душе своей, яко та есть честнейши телесе. да душевную часть нищии сохранят, да егда востребуеши милости, и помощи Божия, готово обрящеши во время исхода.

## *Глава 74*

Насыщаяся многосластного пития, помяни нищаго теплу воду пиющаго, от солнца востопившуся, и туже прахом нападшу.

## *Глава 75*

В богатстве сыи и земных благ изъобилие имеяи, помяни выну слово Авраамле к богатому, восприял еси благая в животе своем, якоже и убогии злая: темже он веселится, ты же страждеши.

## *Глава 76*

Возлежащу ти на многомягцей постели, и пространно протягаяися. помяни на голей земли лежащаго под единственным рубом. и не дерзающа прострети ногу своею, недуга ради и зимы.

## *Глава 77*

Лежащу ти в твердопокровенне храмине, и слышашу от шума дождевнаго множество гласа. помысли убогих како лежат ныне. дождевными каплями яко стрелами пронзаеми, а другия от неуснутия седяща, водою же подъята.

## *Глава 78*

Седящу ти в зиме, в теплей храмине, и без боязни изнажившуся, воздухни помыслив о нищих, како клячат над малым огнем трясущеся, и большую беду очесем от дыма имуще, руце токмо согревающе, плеши же и все тело мразом изъмерзше.

## *Глава 79*

Духовная гони, духовная и помышляй, а не земная. ведыи яко по нетленному одеянию крещения, вси равны суть убозии, и

богатии. темже блюди, еда по земному помышляи, убогаго тленною одежею, с тобою не равно одеянна презиши.

### *Глава 80*

Церкви Божией зовущей тя на молитву, остави дело земное кое любо буди, и иди на душевную пищу со тщанием яко Петр, и Иоанн, ко гробу Господню.

### *Глава 81*

Идущу ти во святыи храм, помысли, еда кого разгневал еси в коем любо деле, и всяко потщися гневныи облак разгнati, да яко солнце освятит душу твою молитвеная доброта.

### *Глава 82*

Покрывает мрачныи облак, солнечную доброту. и губит молитвеную красоту, помнение гнева.

### *Глава 83*

Вступив в двери церковныя, мыслию самая врата небесная пройди и всю годину тайныя службы со удивлением и со страхом стой. сматряй с верою бывающих, телесныма очима, и душевными. сице и сам применишися от земных мыслей на будущая.

### *Глава 84*

Видев честныя и освященные дары в жертву Богу о всех приносимыя, воздев руце на небо рци благодарно с верою. Слава Твоему человеколюбному смотрению, Спасе всего мира Христе Боже.

### *Глава 85*

Размышляй по вся часы, частая согрешения своя, премногое же и безчисленое человеколюбие Божие, еже к человеческому роду имать, и до последняго изыхания ожидай покаяния.

### *Глава 86*

Темже предвари лице его исповеданием, прииди потщися, припади пред Господем, и восплачися пред сотворшим тя, зови милости Его, приглашай щедроты Его даже смерть не варит тебе.

### *Глава 87*

Не рцы много согреших, и много беззаконовах, не имам дерзновения еже к Богу припасти, не отчаявайся, не прилагай

кому отселе согрешений, и помошю Всемилостиваго не посрамлен будеши.

### *Глава 88*

Не ложь бо рекии: грядущаго ко Мне не иждену вон, и по сих всех: обратитесь рече ко мне, и исцелю вы, яко не хощу смерти грешнику. темже дерзай и веруй яко чист сыи, и приближающагося к нему очистит.

### *Глава 89*

Аще истинно покаяние хощеши прияти то яви е делом, аще о гордости каешися, покажи смирение: аще ли пианства, покажи пост: аще любодеяния, покажи чистоту. уклонибося рече от зла, и сотвори благо.

### *Глава 90*

Токмо не косни в тине греховней, да внезапу погрязновение приимиши, воздохнеши бо, и не будет послушающего, егда ангел Господень станет пред очима твоими, врази же твои яко облаци покрыют тя.

### *Глава 91*

Внемли души своей, яко едина ти есть, и едино время живота, не ведом конец, и непроходима пучина воздуха, и враг твоих исполнена, несть бо помогающаго, разве добрых дел, темже всею силою своею взыщи сих.

### *Глава 92*

Въступи на добродетелныя стези, и пойди скоро, даже вечер не постигнет, потщися ко вратам вышняго града, не уклоняйся, ни на десно, ни на шуее. да не заблудиши в пропасть мучения.

### *Глава 93*

Епископом Паstryрем Христова стада, словесных овец, главу свою поклоняй, со всяким благоговением, и дастьтися благословение Божие.

### *Глава 94*

Презвитеры, иереи Христовы, представители тайней Его трапезе, всякою честию почти и любовно их, заповедей Христовых учащих, послушай.

## *Глава 95*

Такожде диаконом подъдиаконом, и четцем, яко служителем Божиим, честь подобающую воздавай, и тщися ни единаго их оскорбити.

## *Глава 96*

Аще убо стоящих пред земным царем со страхом чтиши бояся, ниже словом пререкающи им. како убо разумееши о слугах небеснаго Царя.

## *Глава 97*

Монастыри, и дома святых посещай, виждь житие, чин, и строение их, и видев пребывание их, окаеши житие свое, и управишися оттоле.

## *Глава 98*

К сущым же в горах не ленися ити, взыщи благословения и молитвы. аще что имаши телесныя потребы, донеси им, и приемиши душевную пользу.

## *Глава 99*

Паче же всякаго мниха не тщися без поклонения минути. аще бо знаемым токмо поклоняешися и чтиши, то по содрежанию есть, а не по чести образа сущаго на них.

## *Глава 100*

Конец же всем реченым.

Возлюби Господа от всяя души, и страх Его да пребудет в сердцы твоем, праведен буди и истинен, покорлив, долу понича. ум же к небеси простирая, умиление к Богу, и к человеком имеяи, печалнаго утешитель, терпелив в напасти, и не досадитель, щедр, и милостив. нищым кормитель, странноприемник. скорбен грех ради, весел о Бозе. алчен буди и жажден, кроток, приветлив, не славохотен, не златолюбец, друголюбец, не лицемерен, не горделив, подвижник к Богу. во ответех сладок, частомолитвеник, разумен, не осудник всякому человеку, поборник по всех обидимых. и будеши чадо евангелия, сын воскресения, наследник жизни. о Христе Иисусе Господе нашем, Ему же слава и держава, честь и поклоняние, со Отцем и с Пресвятым Духом, и ныне и присно и вовеки веком аминь.